


AKASOLYA KE MMAMBA ENNANGIRA NAMUNJOLOBE BWERENGA - BUSIRO



**OKULAMBIKA ENNONO YA JJAJJA KIRULU
OWAKASOLYA KEMMAMBA ENNANGIRA,
ABAANA NE BAZZUKULUBBE**



*Omutaka Kirulu Musoke Sinagabula III, Jjajja wa kasolya ke Mmamba ennangira
mu Buganda*

ABAKUNJAANYA N'ABAWANDIISI BA KATABO

ABAKUNJAANYA

Prof. Naggenda Francis: Ssentebi w'akakiiko akakuuyaanya ebiwandiiko ava
mu Ssiga lya Mulinde e'Mulajje-Kyaggwe.

Omw. Kibuuka Charles: ava mu Ssiga lya Mugula, Entebbe-Busiro.

Omw. Kizito Dennison: ava mu Mutuba gwa Ggwaabya/Kkerebwe, e' Navvule
Bwerenga- Busiro.

Omw. Sisaaga Andrew: ava mu Mutuba gwa Nkoola, Namabo-Mawokota.

ABAWANDIISI

Omutaka Serugo, Babuuzibwa Mukasa Luutu: Ssentebi w'olukiiko lw'ennono ya Kirulu,
mu Kasolya ke Mmamba ennangira mu Buganda, ara
Ssentebi w'olukiiko lwa Namaaba e Kagulu-Kojja, Kyaggwe.

Eng. Dick Nsubuga Makande: Omuwandiisi w'oLukiiko lw'ennono ya Kirulu, mu
Kasolya ke Mmamba e'Nnangira mu Buganda, ava mu mutuba
gwa Ggwaabya\Kkerebwe e'Navvule Bwerenga- Busiro.

Omutaka Nabaja Lugembe, Ssalongo Wannyu ava mu Ssiga lya Namaaba e Kagulu-Kojja,
Kyaggwe

Omw. Kizito Nnabbe: okuva mu Ssiga lya Mugula Entebbe, Busiro

OKWEBAZA

Okusiima okwenjawulo kugenda eria bakulu abataka na bazzukulu banno wamanga o'lwamagezi gabwe n'ebafaayo by'ebatuwadde okutusobozesa o'kuwandiika akatabo ke kika kye mmamba ennangira mu Buganda.

Hajji Abdu Guyidde:	Omutaka Kiyima wa Mutuba era Omuwaniika wa Kasolya ava mu Namaaba e Kagulu Kojja, Kyaggwe.
Ssalongo Ddamulira:	okuva mu mutuba gwa Buzigi e'Nansana-Kyaddondo.
Omutaka Phillip Mulinde:	owe Ssiga lya Mulinde e'Mulajje Kyaggwe.
Omutaka Namaaba:	owe Ssiga e Kagulu-Kojja, Kyaggwe
Omutaka Kisuze:	owe Ssiga e Katwe, Nakawuka, Busiro
Omutaka Ssenfuma:	owe Ssiga e Kanyike, Mawokota
Omutaka Katagye:	wa mutuba mu Ssiga lya Kisuze e Katwe Nakawuuka
Omutaka Munoga:	wa mutuba mu kasolya ka Kirulu
Omutaka Nkoola:	wa Mutuba mu Kasolya ka Kirulu
Omutaka Kkerebwe:	Ssabalangira w'ekika kye Mmamba ennangira
Omutaka Ttonda Nkunyi:	okuma embuga ya Ttonda e Busomba Mawokota

EBIRIMU

	OLUPAPULA
ABAKUDJAANYA N'ABAWANDIISI BA KATABO.....	iii
OKWEBAZA.....	iv
EBIRIMU.....	v
ENNYANJULA.....	0
JJAJJA W'ABEMMAMBA	3
OBULAMBE BWA JJAJJA KIRULU.....	5
OMULANGIRA KINTU.....	6
OMUKAGO GWA KINTU NE KIRULU	7
OBUZAALE BWA BBEMBA MUSOTA.....	7
MUBIRU OBA GABUNGA YANI?	8
EMMAMBA NAMUNJOLOBE.....	10
AKABBIRO K'EMMAMBA ENNANGIRA	11
OMUBALA GW'EMMAMBA ENNANGIRA	11
ABAANA BA JJAJJA KIRULU.....	12
ENSIKIRAGANA MU BWA KIRULU	13
EMIKOLO KU KIDDIBA MMAMBA	14
EBIDDIBA EBIRALA	14
OLUTALO LWA KKONGE.....	15
EnjŋOMA ZA JJAJJA KIRULU	15
EMBUGA YA KIRULU E LUWUNGA	16
MUKALAZI KIGUMBA, MUGEMA.....	17
EMIRIMU GYA MUKALAZI KIGUMBA.....	17
ABAANA BA MUKALAZI KIGUMBA	18
OMUTAKA NANKERE MUZZUKULU WA KIRULU	18
EKYALO KYANJOVE.....	18
EMIKOLO EGIKOLEBWA KU KIRULU.....	19
EMITUBA GYA KIRULU.....	20
ABAANA N'ABAZZUKULU BA KIRULU ABAMASIGA	22
EBYAFAAAYO BYA ABAANA NA BAZZUKULU BAKIRULU	25
OMUTAKA KKEREHWEE.....	25
OMUTAKA GGWAABYA	28

OMUTAKA LUKUMBIRUTONO.....	31
OMUTAKA NAMAABA KIYAGA GUTWEGUTWE.....	32
OMUTAKA MULINDE.....	36
OMUTAKA KISUZE.....	37
OMUTAKA SSENFUMA SSEMPIIRA.....	38
OMUTAKA NKOOLA	40
OBUZAALE BWA BUKULU BWA WADDA – MUGULA.....	43
OMUTAKA MUNOGA	49
EBYAFAAAYO BYE BWERENGA MU MYAKA NGA 110.....	51
 OKUSENGUKA OKUVA E BWERENGA	51
ENKYAYAANA KU BWAKIRULU.....	51
SSABATAKA ASALAWO	52
EKIKA KYE MMAMBA KIVUDDEMUSBIKA EBIRALA BINGI	53
OBULANGIRA BUKOMA	53
Enkookeero 1: Okuserera Kwa Ssabalangira Kkerebwe Mutebi Lawrence.....	55
Enkookeero 2: Obwakabaka Bwa Buganda Obwasooka.....	59

ENNYANJULA

Mu byafaayo bye ndowooza ya Baganda, Omuganda yalina endowooza nti ensi eno kwetuli teyaliko muntu yenna okuva eyo ne eri nga, okutuusa ng'omuntu Kintu lwe yagisookako ng'avudde mu ggulu ewa Katonda era nga yezyazaala abaana aba gisaasanirako awo mu ndowooza eno ne yeraba nga nansangwa ku nsi. Naye nno endowooza nga eno kumpi buli ggwanga ligirina endowooza yalyo ekwata ku byafaayo byayo ebilyawula oba ebigissa mu kifo oba ensi mweba eri.

Kale Buganda tesobola kuba Buganda nga tewali Baganda era baba n'ennono, empisa mu bulamu o'bwabulijjo nga babyenyumiririzaamu wamu n'okubukuma nga bya muwendo gyebali ate ne babyagazisa n'abatali Baganda, kino kireetera abalala okweyita abaganda wadde nga si baganda, obwo bwe buggagga mu buwangwa.

Buganda erina ebyafaayo biwanvu nnyo era ebimu bibutikiddwa mu nkumi n'enkumi ze myaka. Mu myaka egyo muze mubamu embeera ez'obudde ezizze zibutikira ebisigala ebyandibadde bitulaga embeera n'emirimu egyakolebwanga o'muganda. Entalo nazo zaaleeta okusaanawo kwe byafaayo bya Buganda bingi, nga kiva mu mpalana, okulyolyoma kino ne kisissa, abantu abawonyewo ne baddukanga n'okwekwika mu mawanga amalala, okunyaga abakazi na baddu nebyingizibwa mu bika. Ate ku ludda olulala oluusi ebika ebimu byassibwangako ebiwendo, ne kiwaliriza ebika ebimu okwekwika mu binnabyo, oba okuwangangukira ku bizinga ne mu bitundu ebirala eby'ensi!! Eno ye nsonge egambisa nti mu nsi yonna gyefa yenkana tewali ggwanga lirina musaayi gutalimu musaayi gwa ggwanga ddala.

Omuganda kye yava yejita omuganda kubanga okukola omuganda omala kulondeerera wano na wali n'ofuna omuganda. Kale no mu Buganda ekika kye mmamba ennangira kituwa ekyokuyiga kirungi nga kirambika ennono yakyo nokulaga nga ebika ebirala bwe bikyegatako okukola ensi Buganda nga bwe kirambikiddwa mu kitabo ekikulu ennyo ku nsonge za Buganda

ekyawandikiibwa eyali omuwandiisi wa Katikkiro wa Buganda Sir Apollo Kaggwa, omulangira Eriya Buliggwanga ekiyitibwa: Ekitabo Kye Kika Kye Mmamba (1905-1915).

E'kigendererwa kye kitabo kino kakano kwe kwongera okumanyisa abaana nabazzukulu obuvo nobuddo bwennono yaffe era nokwongera okutangaaza ku nsonga ezimu ezitwezinzem si lwakuba nti tetumanyi naye olukuba nti tumaze ebanga ddene nga tuli mu buwambe mu banaffe abemmamba Namakaka (Gabunga) wamu nabamu okutandika okulowooza nti muzzukulu waffe Nankere owa Kakoboza ye wa kasolya ke mmamba ennangira ekitali kituufu nakamu mu nnono ye mmamba ennangira mu Buganda.

Namunjolobe (Mmamba ennangira), ye nasangwa, namuziga era entabiiro y'obwakabaka bwa Buganda ne bika bya Buganda ebisinga obungi mu kiseera kino. Era kirabika wabaddewo ekobane elyokusanyawo no kufebya ennono yaffe mu bika bya Buganda nga kikolebwa ba ssekinomu abagenderera okusanyaawo ebyafaayo by'emmamba ennangira wamu n'okulemesa abazzukulu okumanya ekituufu ku kika kyabwe.

Twagala okwebaza okwenjawulo kugende eri bajjaajja ffe abataka aba masiga, mituba, ne bazukulu baabwe abatutte akaseera nga banoonyereza ku nnono yaffe wamu nokumanyisa abazzukulu ensonga enku wamu nokulwanyisa ensowole mukika kyaffe ekyemmamba ennangira.

Abaamu bayinza okwebuuza nti mwali luddawa era mubadde luddawa? Omuganda yenna gyafa yenkanna alina emmizi era tamala gogera bigambo byatalinako mutwe na magulu. Kale kati kano kekaseera okwongera okumanyisa bazzukulu baffe nti tubadde tunoonyereza ku nsonga enku zetujja okusibirira bazukulu baffe wamu no kubasobozesa okuddamu ebibuzo nga ebyo wagulu.

Era kano ke kaseera buli eyeddira emmamba yenna ssimutto oba ssimukulu okutandika okwekebeera oba okubuuza jjajja we owessiga oba owomutuba amulambulire obuzaale bwe obw'ensikirano. Mu katabo kano tugenda kulaga abaana nabazzukulu abava mu jjaaja Kirulu omukulu wa kasolya

kemmamba ennangira wamu nokwongera okulaga enjawulo eri wakati waffe ne Gabunga era noluganda lwetulina ku mutaka Nankere, okutangaaza ku buzaale bwa Kabaka Bemba Musota wamu "n'okujja" kwo mulangira Kintu mu Buganda. Era akatabo kano kajja o'kulaga lwaki abemmamba tebasaanidde kwongera kwewasa nga bwe kibadde kubanga abamasiga agasinga bona bava mu mmamba ennangira Namunjolobe. Era kiba kivve okwewasa abalangira na bambejja.

Ebyo nga biri bityo tuli basanyufu nnyo Ssaabasajja Kabaka Muwenda Mutebi II okulengera ewala okulagira ebika byonna mu Buganda, bisobole okwemalamu obulimba n'okwegyamu ensowole mu bukulembeze bwabyo. Tuli bagumu nti ab'emmamba ennangira abakyabuzabuzibwa, bajja kulaba omusana badde eka.

Tubaagaliza okusoma okulungi era nokumanyisibwa okwenjawulo.

Ssaabassajja Kabaka Awaangale!!



*Katikkiro wa Buganda owekitiibwa JB Walusimbi nga aliwamu nabeddira
Emmamba Ennangira ku wankaaki wa Bulange, abaakiika embuga nga 23 August
2011*

JJAJJA W'ABEMMAMBA

Ekitabo kye kika kyemmamba kikakasa nti Jjajja w'abantu bona abemmamba yali Kabaka Bukaddebukokooma era ono nga ye Nnansangwa wo mu Ssaza lya Ssaabasajja erye Mawokota. Era ekitabo kino bangi bakiyita n'erinnya lino erya 'Bukaddebukokooma'.

Era Jjajja ono bangi baamuyitanga Omuganda w'e Mbaale; mu Mbaale muno mweyazaalira abalingira be Bukuku ne Buganda. Bukaddebukokooma bwe yafa mutabani we Bukuku n'amusikira, era Bukaddebukokooma yagibwa n'oluwanga olwayitibwa Bubuzi era lukumirwa mu kyallo Naziri eky'omutaka Nsaale ow'olugave.

Ye Bukuku yazaala abaana:

1. Ttonda
 2. Bwoya
- Nabalala bangi.

Bukuku bwe yafa yasikirwa mutabani we Ttonda. Ono bwe yasika n'agenda azimba mu kyallo Butonda era e Mawokota. Ate Abataka baategeeza nti Ttonda yali Jjajja wekika omukulu eyeddira emmamba eyitibwa 'Namunjolobe'. Eno ku mirembe egy'edda ng'esangibwa mu kiddiba Mmamba e Bwerenga. Akabbiro k'ekika nga ye Munkunga oba Muguya oba Katuba.

Abataka Abemmamba bategeeza nti muzzukulu waabwe Kintu (Ssekabaka) okukomawo yasanga mu Buganda nga abemmamba eNnangira be balya Obuganda.

Ttonda yazaala:

1. Wabinga
2. Wemba Ssekugulukumu era ono abamu gwebayita Ggulu ne Wavujja Ssese lya kweba.

Wemba Ssekugulukumu bwe yaseleera ne bamuziika mu kibuga kye Mavunzaggulu awo okumpi ne Mpigi mu Mawokota. Yafa azadde abaana bano:

1. Kisolo
 2. Kagulu
 3. Ntutumo
- n'abalala bangi.

Kagulu ye yamusikira, era nagenda azimba e Nanziga mu Busiro. Yazaala abaana bano:-

1. Kirulu
 2. Nakenge Mabanga
 3. Bukaddebukokooma
- n'abalala bangi.

Kagulu bwe yafa mutabaniwe Kirulu namusikira era n'ava e Nanziga n'agenda e Bulama mu Busiro eyo gyeyava nagenda e'Bwerenga ku Nnyanja e'Kiyulwe mu Busiro. Buli muganda yenna eyeddira e'mmamba nnasangwa asobola bulungi nnyo okweruka okuva ku Bukaddebukokooma okutuuka ku Bbemba, era enno gyebayita emmamba ennangira.

OBULAMBE BWA JJAJJA KIRULU

Jjajja Kirulu ye mukulu we Mmamba Namunjolobe ennangira ey'abaana n'abazzukulu ab'oluse lwa Kabaka Ttonda olusibuka mu Kabaka Bukaddebukokooma. Oluse luno ye nkata y'obwakabaka bwa Buganda. Jjajja Kirulu ye mwana asooka owa Kabaka Kagulu e Nanziga mu Busiro, nga bwekirabise wagulu era yeyamusikira n'alya n'obwakabaka. Omulongo we yamutuuma Kayizzi.

Jjajja Kirulu muzzukulu wa Kabaka Ggulu Wembala Ssekugulukumu e Ssenene, Mawokota; Muzzukulu wa Kabaka Muntu e Kiwawu, Busuju; Muzzukulu wa Kabaka Ttonda e Busomba, Mawokota; Muzzukulu wa Kabaka Bukaddebukokooma e Naggalabi – Buddo, Busiro. Kabaka Bukaddebukokooma bwe yakisa Omukono yajjibwako oluwanga era ne lukuumibwa mu Kyalo Naziri mu Mawokota. Kale Jjajja Kirulu y'asimbidde ddala mu nnono eyo, mu busimalala, esibuka ku Jjajjaawe Kabaka Bukaddebukokooma eyatandikawo ekika era eva mu Kabaka Ttonda atwalibwa okuba Jjajja w'oluse olulangira omukulu.

Bakabaka aboluse luno ensi gyebalamulanga yayitbwanga Bulama nga erimu amasaza gano: Kyaddondo, Mawokota, Busiro, Kyaggwe, Ssese, Busuju ne ttundutundu erya Bulemeezi, Bugerere ne Ssingo. Naye ku mulembe gwa Kabaka Kirulu wabalukawo entalo eza kirwanire mu bulangira nezibunya ab'ekika emiwabo era abamu basibira Kiziba. Olwo o'Bulama ne butandika okuliibwa abalangira abamatabi amalala omwali

n'abamu okutandikawo ebika ebyabwe, okugeza: nga eky'e Ffumbe n'ekye Mbwa. Kino kye kyavaako Obulama okubutuuma Muwawa.

OMULANGIRA KINTU

Abawandiisi bangi ku Buganda batebereza obwa Kabaka bwa Buganda ng'obumaze emyaka 600 oluusi bagamba 1000. Naye ekituufu kiri nti obwa kabaka bwa Buganda bwava dda nnyo,ku kutandikibwawo kw'ensi emannyiddwa nga Bulama, oluusi abamu gy'ebayita Balasangeye. Sso bwe tutunuulira obwa kabaka okuva ku Kintu n'obwa kabaka obw'omulembe ogw'asooka bw'obugatta buba munkumi za myaka.

Naye newankubadde ekyo kyali bwekityo, Kirulu yasigala nga yakulira emmamba ennangira yonna n'okuvunaanyizibwa ku nsonga enkulu n'emikolo gyonna. Eno ye nsonga lwaki muzzukuluwe Kabaka Bemba bwe yalemererwa okulamula obulungi Obuganda, abalangira n'abataka abakulu gwe batuukirira. Jjajja Kirulu yalagira abaana be Kiyaga Ssemubiru ne Kiyaga Ggutwegutwe Namaaba n'Omuzzukulu Kasiga Ssebalamu batabaale Bemba. Mu ngeri yemu yagaba Kimbomba Nfudu ava mu Namaaba okuba Omugabe w'olutalo olwo era n'amulonderako Bakalabalaba bano, nga bazzukulu: Nnaberenga, Walusi, Nanga, Bulemeezi, Kasakasa awamu ne Kimyanku, Manyowenu ne Jjita abaagabibwa Wannema ne Mbuubi e'Ssese.

Olutalo nga luwedde ennono y'obukulu bwa Kirulu era yeyleka mu kuba nti yeyatumya Omulangira Kintu okuva e Mangira mu Kyaggwe gyeyali yekukumye. Olwo Jjajja Kirulu era n'atumira abomu Ssese n'abokulukalu ne bakunjaanira ku mwalo e Kiyulwe, e Bwerenga, mu Busiro, n'abategeeza nga Omuzzukulu waabwe Kintu bwagobereddwa era bwakomawo okulya Obwakabaka.

OMUKAGO GWA KINTU NE KIRULU

Kintu y'atta omukago ne Kirulu asobole okugaziya n'okufuga Obuganda mu ddembe. Ekyo nga kiwedde Kirulu yamusumika era n'alagira Muzzukuluwe Nankere Kiwutta Kyasooka okumutala ejjoba n'okumutikkira Enguugu.

Era mu bukulu bwebumu obwo Jjajja Kirulu yawa Kabaka Kintu bazzukulube SSejjinda Mawande Ssempagama ne Nankere Kiwutta bamulambuze olukalu n'enyanja, okumanya Obwakabaka gyebwali buva ne gyebukoma. Era awo Nankere we yaliira n'obusenero bwa Kabaka Kintu. Era mu bukulu bwebumu Kirulu yawa Kabaka Kintu amayembe gano okumukuumanga: Nawanga, Nkajja, Kavulu ne Kitaka. Ejjembe Nawanga lyeryakuleberanga Kintu, nga lisitulwa Nankere. Nankere obukulu yabujja ku Jjajjaawe Mukalazi Kigumba eyagaweebwa kubanga ye yali Omumbowa wa Kirulu ne Bakabaka abalala abadirira.

Ennono ya Kirulu yazingiramu obuvunaanyizibwa n'okutuma abaana b'enjoma amannya. Kale n'abaana ba Kabaka Kintu ne batuumibwa amaanya gano:

- | | | |
|-------------------|---------------------|---------|
| 1. Kiweewa | 2. Wunyi | 3. Cewa |
| 4. Kalembe | 5. Mulangugamuggale | |
| 6. Nkolazalubebe. | | |

Kale Mukalazi Kigumba ye yakola Omukolo guno. Era olw'omukago guno mu Lubiri lwa Kintu mulina okubaamu ow'emmamba ennangira nga muwala.

OBUZAALE BWA BBEMBA MUSOTA

Ensonga endala, Wanga omwanawe ow'ekkumi n'omu yavaamu ba Kabaka bangi nnyo nga Kati Onsanze, Wanga II, Namusera, Mudondoli - ono y'azaala Bbemba, Musisi, Kimala Empaka Bukulu n'abalala bangi. Waaliwo era n'abaana baabazzukulu ba Kirulu bangi abaalya Obwakabaka nga Lubala Nkose Mbuubi. Kimanye nti Ba Kabaka bona ab'oluse lwa Ttonda baali beddira Mmamba eno e Nnangira, newakubadde nga oluvannyuma nga

Nnajjinda amaze okugabiraabantu emiziro emirala, baayingira emiggya. Mukuyingira ebika ebipyaa, baagenda n'obulangira bwabwe, gwe ate Obulangira mu bika ebyo, bandibujeewa? Awo weewaava endowooza nti Kintu yeeyajja n'ebika ebimu.

Ba Kabaka bona abaamuddirira nga ojeeko Konge, baagendanga e Bwerenga okumulabako n'okumutwaliranga ebirabo nga Omulangira omukulu ow'ennono mu bwa Kabaka. N'olwensonga eyo, Kirulu yasaayisa emyalo mingi okusobozesa ba Kabaka abo okumukyaliriranga.

MUBIRU OBA GABUNGA YANI?

Mubiru ye mukulu wa kasolya ke mmamba Namakaka eyajja obuzi mu biseera bya Sekabaka Kintu we yakomerawo mu Buganda. Omutaka Mubiru yava mu kyondo Kavirondo ekye nnyanja Nalubaale mu Kenya era mu kujja wano yali azze o'kwegatta ku baganda be abaali baasiisira wano edda naddala ku mutala Kitebi. Yayitira Ssese era Abassesse bebamuwerekera okumutuusa mu mbuga ya Mugula Entebbe era abassese baali bamanyi Olujaluo. Era Bukulu bwa Wadda (Mugula) namusiiga ewa Kalyango ow'engo okumutwala mu Lubiri ewa Kabaka.

Naye tulina okulaga amannyage amatuufu omutaka Mubiru yalina erinnya eddala lye yajja nalyo erya Ombiru ery'agandawala obulungi n'erifuuka Mubiru. Era abawandiisi bebitabo bangi balaga nti Mubiru yava mu buvanjuba okujja wano mu Buganda nga Kirulu ye mukulu we kika kye Mmamba nnansangwa (Laba Ekitabo Kye Kika Kye Mmamba ekya wandiikibwa Eriya Buliggwanga olup.no.301).

Mubiru yalya ekitongole kye Mpingu ya Kabaka Kintu, nafuuka Gabunga. Gabunga linya lya bwami nga bwetulabye wagulu era nga bwe kiri ku baami ba Kabaka abalala okugeeza Pokino, Mukwenda na barala era ekyo tekyafula nti buli eyaweebwa obwami nga mukulu wa kasolya okukyusa erinnya lyo mukulu wa kasolya. Era okumusobozesa okukkalira obulungi mu Buganda

yalina okuba n'ekika nateekawo **eky'emmamba Namakaka**. Era mu kuteekawo emmamba eno yayambibwako abataka abamu okusobola okugifunira ennono yaayo, naye ennono ye mmamba eno yakoppebwa mu mmamba ennangira!! Eky'okulabirako akabbiro “omuguya” kaali ka mmamba ennangira. N'omubala gwe bakuba b'agujja eno ewaffe mu mmamba ennangira. Okubikka akabugo nga Ggabunga afudde n'okwambala ebikomo byonna bikoppe, akalombolombo ka Ggabunga ng'afudde bamujjamu amannya abiri wansi okukakasa n'okulaga nti bo Bamogera!!

Era mu kuwamanta ennono batadewo ne mituba gyebayita emirangira, gyava e Kavirondo teriyo bwa kabaka naye yenyini si mulangira. Kale emituba emirangira givaawa? Bazzukulu baffe balina okumanya ensonga eno.

Kale Gabunga yazaala abaana banno wamanga:

1. Kituubi e Kitubulu mu Busiro
2. Kasozi e Kiwumu mu Busiro
3. Kibira eSazi
4. Galiwango e Namugala
5. Mpungu e Lubya
6. Mukuye e Lubya
7. Kipaka e Lukumba
8. Mutekanya e Kaga
9. Gafumba e Buyego
10. Lukandwa e Misindye
11. Muzingu e Buzingu mu Mawokota

Abo be baana ba Mubiru (Gabunga) be yazaala nga eyali mu butaka bwa Mubiru bwe yategeeza Eriya Buliggwanga (laba ekitabo kye kika kye Mmamba, olup. No.362). Era abaana bebazaala be bazzukulu ba Gabunga mu musaayi mu b'emituba gino olabyemu:-Bukulu bwa wadda (Mugula), Kiwutta Kyasooka (Nankere), Kasiga e Bbendegere, Kisuze e Katwe, Ssenfuma, Namaaba, Kkerebwe, oba Ttonda-Nkunyi n'abalala?

Tuwaliriziddwa okwanja ensonga ezikwata ku mmamba Namakaka okumalawo obulimba, nti Ggabunga ye jjajja w'ekika ky'emmamba nti era tuli bazzukulu be tubalaze nti tetulina kakwate konna mu musaayi, byafaayo oba buvo n'emmamba gy'akulira. Gabunga yafuka Jjaajja w'emmamba wano ku mulembe gwa Ssekabaka Muteesa I mu mwaka 1881. Yafuka muganzi nnyo ewa Kabaka Muteesa I, yawaasa n'omumbejja olwokuba yali muko w'embuga namuwa okubeera omukulu we mmamba mu Buganda.

Kituufu ab'emmamba ennangira bangi bakyawagamiddeyo ewa Gabunga olw'obutamanya buzaale bwabwe butuufu. Ate abamu olw'okuba balinayo obukulu batya okuvaayo naye ng'ate bamanyi bulungi Jjajja we Kika kye mmamba mu Buganda ye Kirulu!!

EMMAMBA NAMUNJOLUBE

Ennono ya Jjajja Kirulu eri mu Mmamba Namunjolobe gyetweddira era yalina obuvunaanyizibwa obwenkomeredde ku mmamba eno. Yeyakuliranga emikolo egyabangawo buli mwaka ku butaka bwe mu kifo Kiddiba awalinga ennyanga e Lukumba, e Bwerenga, era ennyanga eno yagattanga ku nnyanja Nalubaale.

Emmamba eno ye Mmamba ennangira era ye y'oluse lwa Bakabaka abasooka okuva ku Kabaka Bukaddebokokooma okutuuka ku Kabaka Bemba nga egyo gye mirembe 52. Era okwo kwe kwava n'enjogera nti "**Siri wa Mmamba ndi Mulangira**". **Oba nti "Siri Mulangira ndi wa Mmamba"**. Emmamba eno Musangwa Mutonde era Bajajjaffe nga bagiyita Lubaaale Mmamba. Ekiddiba mweyabeeranga nakyo kyayitibwanga erinnya "Mmamba" era yazimbirwa ne Ssabo mu kifo kyekimu.

Emmamba eno erina amannyasatu: erisooka:

1. Namunjolobe
2. Nnakibalo
3. Muloma

Mu ndabika y'omusangwa, Namunjolobe yali efanaana nga kumpi goonya newankubadde eri abamu yeoleka ng'omusota, ate eri abalala ng'omunya ogwa Sungulubebbe.

AKABBIRO K'EMMAMBA ENNANGIRA

Akabbiro nako kalina amannya asatu:

1. Munkunga
2. Muguya
3. Katuba

Naye erinnya Muguya bannaffe abeddira emmamba eyava e Bumogera gyebayita Namakaka, baalyekomya okuba akabbiro kabwe, olwobuwaze Emmamba Ennangira bwe yalimu mu biro ebyo.

OMUBALA GW'EMMAMBA ENNANGIRA

Omubala guvuga nti:

*“Mu kiddiba mweri ezannya;
Nakibalo, Namunjolobe gyeri e Lukumba;
Nnimi nnamu zinkyaye;
Lubaale Mmamba akyanjagala;
Abalya Emmamba balye eyaabwe;
Kibomba Nfudu okonkomadde ku Kyoto;
Weerabidde ogwa Kanoonya gwe yakola?
Ku nnyanja kuliko olulyo;
Bampe engabo yange nyende gye balwana!”*



*Omuzzukulu Kibuuka Charles nga akwatidde Ssabalingira Kkerebwe Mutebi
 Lawrence enyoma nga akuba omubala gw'emmamba eNnangira ku mukolo
 gwokumanyagana nga 11 December 2010 e'Namulanda ku Mac Beach*

ABAANA BA JJAJJA KIRULU

Jjajja Kirulu yazaala abaana bano wamanga:

1	Kasozikabenge	11	Wanga	21	Natebera
2	Musoke Ssebagulu	12	Budde	22	Nagaddya
3	Kkerebwe	13	Kiyaga Gutwegutwe	23	Namugenyi
			(Namaaba)		
4	Ggwaabya	14	Lukuba		
5	Nkwangu	15	Nakamya	24	Nakirulu
6	Ssemubiru Kiyaga	16	Kitaka	25	Nansubuga
7	Mukalazi	17	Ssemubiru Ssewaya	26	Nankya

	Kigumba			
8	Kasanvu	18	Namutema	27
9	Nsubuga	19	Nkabiddwa	Nakiboneka
10	Kiwanuka	20	Nakasiga	

ENSIKIRAGANA MU BWA KIRULU

Kirulu yasikirwa mutabani we Musoke Ssebagulu. Ba Kirulu abaddirira okutuuka ku aliwo kati:-

- a) KIRULU MUTABANI WA MUSOKE SSEBAGULU
- b) KIRULU SSENDIGGYA
- c) KIRULU KYAATO
- d) KIRULU MAKALU
- e) KIRULU KILALAANKUBA
- f) KIRULU NNANTAGGYA nga kw'ono nga SSEMAKOOKIRO ye
Kabaka wa Buganda ettuttumu n'ekitiibwa ky'enngoma ya KIRULU
kwe byakenderera amaanyi
- g) KIRULU MUWAMBI
- h) KIRULU SSINNAGABULA I
- i) KIRULU MBAZZI TEYUNJA
- j) KIRULU KIGWANA NJALA EBUZA
- k) KIRULU SSINNAGABULA II
- l) KIRULU MUKULU AWEEBWA
- m) KIRULU MASWA

NB: Ba Kirulu bawangaala nnyo ku ɳŋoma.

EMIKOLO KU KIDDIBA MMAMBA

Emikolo gyoku kiddiba gyabangawo buli mwaka era gyasombanga abantu okuva ku lukalu ne ku bizinga e Ssese. Jjajja Kirulu nga tanatuuka baaleetanga entebe ye ey'omuvule ne bagitereeza mu maaso ge ssabo lya Mmamba, awo Jjajja wa baana natuula mu ntebe.

Olwo Abataka bona ne bwamwanjulira ennyimbe ez'abazzukulube abaafa, buli Bantu n'abasika baazo, ate ne bategeeza n'obulwadde obwamutta, oba enfa yonna endala.

Kale abakuno ku Buganda bwe bamalanga ezaabwe, oyo eyalinga mu busika bwa Omutaka Lukumbirutono n'ayanjula ennyimbe ez'e Ssese. Olwo Jjajja Kirulu n'akakasa abasika.

Omukolo omulala omukulu ku kiddiba:

Omutaka Musoke Ssebagulu yaleetanga ente envubuka ennume ku kiddiba ne balamiriza ebigambo bingi, olwo Emmamba Namunjolobe ne kukumuka mu mazzi n'eruma ku kugulu kwente, olwo emizira ne gitta abantu, era bangi amazzi ne gabasamukira.

Era Lubaale Mmamba yawongerwanga buli Namasole w'omulangira alidde enjoma. Omukolo guno gwasembayo okukolebwa Namasobe Kannyange. Bawongonga ente enjeru 9, embuzi enjeru 9, enkoko enjeru 9, emigugu, gyembugo 9, n'ensinda 9 n'ebirala bingi mu myenda. Byaweebwanga Jjajja Kirulu; Kirulu, n'abiwa Kkerebwe; ate Kkerebwe n'abiwa Nankubayaggulo, Kabona wa Lubaale Mmamba.

EBIDDIBA EBIRALA

Walingawo ebiddiba ebirala Emmamba Namunjolobe mweyalabikiranga ng'omusambwa, naye nga nzizi.

(a) Ekimu kyalinga Oluzzi Mubyia, e Nakawuka ewa Kisuze, nga Ssemukuni oba Ddamba nga Bebalabirira oluzzi luno.

- (b) Newa Kasiga e Bbendegere nayo ng'eriyo oluzzi Kasami, olwo lwa Kasiga.
- (c) Ate ne mu Luzzi Namukalazi era muno mwalingamu ne Kikere Balugereza ekyakaabanga enkuba n'ettonya. Era ekikere kino aba Nankere kwebajja erinnya Bukerekere. Era ku Kikere kino kwekuva okugeresa nti Kiwutta Kyasooka azaala nga Nkere.

OLUTALO LWA KKONGE

Nga Kabaka Kirulu ng'amaze okkuba embuga ye e Bwerenga ku nnyanja, Kitaawe omuto, Kkonge, naye n'ayagala okulya obwakabakaa. Olutalo luno lwazuuzumba okumala ebbanga gwanvu, era abantu bangi ne babuna emiwabo ne basaasana.

Abamu baddukira Kyaggwe ate abalala baalaga ku bizinga e Ssese. Era mu bano mwemwali n'Omulangira Kintu eyaddukira e'Kyaggwe ne Bulondoganyi. Kkonge yawangula olutalo luno ne yefuga ensi.

Era ku mulembe gwa Kkonge ekika kye Mbwa we kyatandikira, ne bagunjawo n'obwakabaka obwabwe e Kyaggwe, e'Butonda, mu Ggombolola ye Mutuba I e Kyaggwe.

EñjOMA ZA JJAJJA KIRULU

Jjajja Kirulu yalina ejñoma ezamukubirwanga nga Kabaka era ze zino:-

- a) Mujaguzo eyayitibwanga "Kigubaguba" naye mu kitibwa kino nga mubamu ejñoma nnyingi.
- b) Entamiivu mu zino nga mubamu ejñoma ennene satu.
- c) Ejñoma endala ezamukubirwanga zaali "Kulebera", "Kababembe" ne "Kalyakokka".
- d) N'ejñoma "Namutebi".

Kale Kirulu ye yakubirwanga Mujaguzo. Okwawukanako nabakulu bebika barala abakubirwa omubala.



*Katikkiro wa Buganda oweekitiibwa JB Walusimbi ng'akwasa Omutaka
Kirulu Certificate yokuwagira emirimu gya Ssaabasajja Kabaka*

EMBUGA YA KIRULU E LUWUNGA

Nga Kirulu akubye embuga ye endala ku Kasozi Luwunga, e Bwerenga, waliwo omuwafu, naye wansi wagwo waliwo ekiswa okwo Kkerebwe kwe yayaliranga ebiwu bye n'atuula okwo era ekifo kino n'ekifuuka eky'ekitiibwa. Era Kirulu bwe yabanga aseredde, omusikaawe bamulinyisanga okwo n'alyoka akakasibwa ku busika bwa Jjajja Kirulu. Kale Ekiwu kino okuva okwo ne kiyingizibwa mu Nnono y'Obwakabaka.

MUKALAZI KIGUMBA, MUGEMA

Ku muko gunno tugezako okutanganza abaana na bazukulu oluganda oluli wakati waffe ne Nankere. Omwana wa Kirulu owo'musanvu. Mwono mwemuva Na n k e r e omukulu wa kasolya ke Mmamba Kakobooza.

EMIRIMU GYA MUKALAZI KIGUMBA

Mu Nnono ya Jjajja Kirulu mutabani we Mukalazi Kigumba yaweebwa Obwamugema n'obuvunaanyizibwa obw'okwalula abaana n'abazzukulu, nga Mugema. Era Kabaka Kintu bwe yatwala abaanabe ewa Jjajjaawe Kirulu okubalula, ye Kirulu n'abawereza ewa Mukalazi Kigumba, Mugema, n'abalula.

Mukalazi yaweebwa erinnya erya 'Kigumba' Kabaka Kintu ng'aweeddwa omuwala Naggumba ow'e Ndiga eyava ewa Mbaale, alyokke ayalule abaana ba Kabaka Kintu.

Ate era Mukalazi Kigumba ye yatwalanga mwanyina Namutema, muwala wa Kirulu, namuwa Nankere, Omuzzukuluwe, bwe yamalanga okumufumbirira namutwala omwa Walusimbi olwo n'alya obwannassaza.

Era Mukalazi Kigumba bwe yaweebwa ebyalo bino: 1. Sumbwe 2. Kalambi 3. Kiwumu 4. Kanyogoga ne 5. Nakabugo era n'abeera omukulu wa Bataka bona mu Busiro, Jjajja Kirulu gwe yabuzanga byonna ebyomu Busiro.

Awo Kabaka bwe yakisanga omukono nga Kirulu aweereza eddiba ey'engo n'olubugo eri Mukalazi Kugumba Mugema ng'asumika Kabaka alya enjoma eddiba ery'engo n'olubugo ate naddiru n'erye Mpologoma n'olubugo ng'abiwa Omuzzukuluwe Omutaka Kasuju, ow'olugave. Ate Mukalazi Mugema olwo n'asimbira Kabaka Omutuba ku Wankaaki. Era okuva ku Bakabaka abedda okutuusa ku Bemba nga Kigumba Mukalazi Mugema yajja asimba Omutuba n'okusumika Kabaka. Amaliba ago gaavanga Ssese ewa Wannema.

ABAANA BA MUKALAZI KIGUMBA

Mukalazi Kigumba yazaala abaana bano:

1	Walulenga	6	Katogo	11	Nakkazi
2	Bbira	7	Lukomo	12	Mbajja
3	Kikuma	8	Ssemukadde	13	Lujjumba
4	Mpumbu	9	Ssebbanga Kagudde	14	Kiberu
5	Kizito	10	Lugumba	15	Kisaawe

OMUTAKA NANKERE MUZZUKULU WA KIRULU

Mutabani wa Mukalazi Kigumba oyo waggulu Ssebbanga Kagudde yazaala abaana bano:

- 1 Kiwutta Kyasooka – (Nankere, Oluvanyuma eyafuna erinnya lino olwokuzaala abaana abangi ng'enkere).
- 2 Nakaswa
- 3 Kyejjusa
- 4 Muguluganyana
- 5 Mbajja e Namayamba
- 6 Tegalaba
- 7 Ssegere e Namagera
- 8 Tegalaba e Nkajja

Kale nno mu buzaale Kiwutta kyasooka, Omutaka Nankere Muzzukulu wa Kirulu e Bwerenga, n'akabirye! Era Nankere bwe yasikanga, nalyoka atwalibwa okulanya ewa Kitaawe Ssebbanga ate n'ewa Jjajjaawe Mukalazi Kigumba, Mugema.

EKYALO KYANJOVE

Kirulu yawa Mukalazi Kigumba ebyalo Kyanjove ne Luwe; ate ne Mukalazi Kigumba n'abiwa Nankere okuumiramu amayembe: Nawanga, Nkajja, Kavulu ne Kitaka, agamuweebwa Jjajjaawe Kirulu.

Kabaka Kintu, mu byalo bino Kyanjove ne Luwe yateekamu ne Kitongole 'Ekiwanguzi'.

Era Kabaka bwe yali alambula Obuganda ejjembe Nawanga lye Lyamukulemberanga.



*Katikkiro oweekitiibwa JB Walusimbi nga nyumyamu n'omutaka Kirulu
wamu ne Lubuga we e Bulange Mengo nga 23August 2011*

EMIKOLO EGIKOLEBWA KU KIRULU

Okubikka Akabugo ku Njole. Nga Kirulu akisiza omukono Kkerebwe yatwalanga anasika n'abikka akabugo ku njole ya Kirulu.

Okusumika Omusika. Kkerebwe yatwalanga amaliba ana:

Ery'empologoma

Ery'engo

Ery'empisi ne

Ery'entulege

N'agaliira ku kiswa olwo n'alinyisa Omusika ku kiswa n'amusumika olubugo n'eddiba ey'engo. Ekifundikwa Ky'olubugo ku mukono o'gwaddyo ate ekyeddiba ery'engo ku mukono ogwa Kkono.

Engabo, Amafumu n'Omuggo. Kkerebwe era n'akwasa omusika Engabo 'Babengamazzi' n'amatfumu abiri agekikomo, n'amukwasa n'omuggo 'Sekkira' n'akambe 'Gwogayungira'.

Kkerebwe olwo n'alangirira nti ono yasikidde Omulangira Kirulu. Olwo Kkerebwe naleeta Enkanga nagyoleka Omusika nti yejavubiranga ebyennyanya ebyajjajaawo Wemba Ssekugulu Kumu bye yalyanga.

Awo Omulangira Ggwaabya ow'e Navvule naye n'aleeta Ensawo 'Mukulu-awemba' nagyoleka Omusika, ng'agamba nti Ensawo eno ya Jjajjaawo Ttonda era ya Mukisa.

Kkerebwe era yaleetanga Ente ennume, omusika nagifumita, olwo abantu bona ne bawera.

Omusika yafubutukanga embiro n'amatfumu ge, n'engabo ye bwe yasanganga omuntu mu kkubo ng'akuba mu kifuba ng'akala. Olwo ng'amusika akuze!

N'ebirala bingi ebyakolebwanga.

Olumbe lwamalanga olunaku lumu, era enkeera nga Kkerebwe atala ejjoba ery'ekirangira, ng'ateekako n'ennyonjo kumutwe. Olwo n'amunaanika ebikomo ku mikono ne ku magulu. Awo nga olumbe lwa Kirulu luwedde ng'abantu, baabuka.

Ku mirembe egyaddirira Ssekabaka Kintu, Omutaka Kirulu bwaserera tabikirwa Buganda okutuusa Kabaka aliko lwakisa Omukono. Kale Kabaka oyo bwe yasereranga ne bajja okubikira ab'e Bwerenga ate n'ab'e Bwerenga n'ebagenda okubikira Obuganda nti Omutaka Kirulu yakisa Omukono.

Ku mukolo ogw'okusika Lubuga wa Kirulu ye 'Namiya'. Ava mu Mbuubi. Ate Omulongo wa Kirulu ye 'Kayizzi'. Era Kkerebwe nga yayambalira Omulongo ono.

EMITUBA GYA KIRULU

Emituba gino gy'emituba gya Jjajja Kirulu kati gyalina obutereevu:

- Ssebagulu, e Mubembe, Bwerenga
- Kkerebwe, e Lukumba, Bwerenga

- Ggwaabya, e Navvule, Bwerenga
- Munoga, e Ntolomwe, Butambala
- Buzigi, e Lufuvu, e Nansana
- Nkoola, e Namabo, Mawokota
- Nkwangu, e Kawuula, Bwerenga
- Lukumbirutono, Empatta Buyovu, Ssesse

Omutuba gwa Ssebagulu mwemuva mwokka asikira obwakirulu mu nnono yaffe. Era Kkerebwe ye Ssaabalangira, yasumika era yayambalira Omulongo wa Kirulu.



Okuva ku konno abasooka maaso: Ssabalangira Kkerebwe, omutaka Ssebagulu, omutaka Kisuze, omutaka Kirulu (owa Kasolya), omutaka Namaaba, omutaka Mulinde. **Abayimiridde emabega okuva ku konno:** omuzzukulu Ssalongo Ddamulira(Buzigi), Omutaka Kubikubi, omuzukulu Kizito Nabbe(Mugula), Omuzzukulu Kibuuka Charles(Mugula), omuzzukulu Bbuye(Mugula), Omuzzukulu Nagenda Francis(Mulinde)

ABAANA N'ABAZZUKULU BA KIRULU ABAMASIGA

Abaana aba masiga:

1. Ttonda Nkunyi e Busomba, Mawokota.
2. Ssemubiru Kiyaga, e Ssanda, Busiro
3. Kiyaga Gutwegutwe (Namaaba), e Kagulu, Kkojja, Kyaggwe
4. Ssewaya Ssemubiru, e Buggala, Ssese.
5. Lukuba Ssematimba Wampona, (Mwana wa Kirulu owe 14) e Busami, Busiro.



*Omutaka Kirulu nga ayogera eri bazzukulube nga December 11, 2010
e'Namulanda Mac Beach*

Abazzukulu abamasiga:

- 1 Kisuze, e Katwe, Nakawuka, Busiro
(Ono Muzzukulu wa Kiyaga
Gutwegutwe e Kkojja)
- 2 Mulinde Gerula e Mulajje, Kyaggwe
(Ono mutabani wa Kiyaga)

	Gutwegutwe)	
3	Bukulu bwa Wadda Mugula, (Ono Muzzukulu wa Kkerebwe)	e Buyira, Ntebe Busiro
4	Ssebalamu Kasiga, (Ono Muzzukulu ava mu Lubala Nkose)	e Bbendegere, Busiro
5	Mbjajja Ssempologoma (Ono ava mu Mukalazi Kigumba)	e Namayamba, Bulemeezi
6	Ssenfuma Ssemipiira, (Ono ava mu Kisuze Omuzzukulu wa Kiyaga Gutwegutwe)	e Kanyike, Mawokota
7	Ssempagama Sseggwanga, (Muzzukulu wa Kkerebwe, Ava mu Mawande Ssempagama, era Muzzukulu wa Lukumbirutono)	e Manyago, Busiro
8	Ssennaku Katenda, (Ono avamu Kiyaga Gutwegutwe, Namaaba, era ava mu Kaddumukasa).	e Mayirikiti, Kyaggwe
9	Katenda (Ono avamu Kiyaga Gutwegutwe) era mu Kaddumukasa.	e Zziba, Kyaggwe.
10	Kagenda, (Ono ye Ssematimba Ssemirali. Ava mu Kkerebwe era Muzzukulu)	e Luwunga, Mawokota
11	Nnyenje (Ono Mutabani wa Lukomo e Lubya era Muzzukulu wa Kirulu)	e Kkoome, Kyaggwe
12	Kasenke, (Ono ava mu Munoga Mulyassubi)	e Ntolomwe, Butambala.
13	Mmiiro,	e Luwubu, Mawokota

- (Ono ava mu Wampona)
- 14 Luvule, e Sserinnya, Ssese
 (Ono ava mu Mukalazi Kigumba)
- 15 Mulinda, e Busagazi, Kyaggwe
 (Ono ava mu Namaaba)
- 16 Ssekibo, e Kibanga, Ssese
- 17 Lugunju, e Bbira, Busiro
 (ava mu Mukalazi Kigumba)
- 18 Lutimba, e Kibulala, Ssingi
 (ava mu Kiyaga e Ssanda)
- 19 Bukulu Bwa e Kamunye, Busiro
 Wadda Sserugunda
 (ava mu Mugula),
- 20 Ssebawuttu, e Nsamu, Mawokota
 (Ono mwana wa Wampona)
- 21 Mmiiro, e Zzinga, Busiro
 (Ono ava mu Lutimba ne Kiyaga e Ssanda)
- 22 Munyanya, e Mpatta, Buvuma
 (ava mu Namaaba)



*O'wekitiibwa Godfrey Lule eyali Ssabawolereza wa Buganda nga ayogera
eri abeddira emmamba e'Nnangira nga 11 December 2010 ku mukolo
gw'okumanyagana*

EBYAFAAAYO BYA ABAANA NA BAZZUKULU BAKIRULU

Jjaajja Kirulu yazaala abaana bangi era nafunna na bazzukulu bangi nga bwetulabye waggulu. Wamanga bye byafaayo bya bamu ku baana na bazzukulu.

OMUTAKA KKEREBWWE

Kkerebwe mutabani wa Jjaajja Kirulu ow'okusatu era mu kika ky'emmamba ennangira yomu ku mituba gya Jjaajja Kirulu egiri mu Kasolya. Kirulu yamuwa Obutaka bwe e'Lukumba, Bwerenga.

Ezzadde lye:

Kkerebwe yazaala:

1. Kkerebwe
2. Nankubayagulo
3. Kagiri



- 4. Kinaatama 5. Zigulaki 6. Kasuli
- 7. Kagenya 8. Sserugomera 9. Kinenye
- 10. Mutaleko 11. Namboole 12. Bwebaajja
- 13. Kitende 14. Kiwutta 15. Kyasa

Ennyiriri ez'omutuba gwa Kkerebwe:

1. Olwa Nyago, e Kikusa , Namulanda, Busiro
2. Olwa Kasongovu, e Kakakala, Bulemeezi
3. Olwa Tayigika, e Kitende, Busiro
4. Olwa Bukunja, e Kitende, Busiro

Mu nnono y'ekika ky'emmammba ennangira Kkerebwe ye Ssabalangira. Era Jjajja Kirulu yamuwa omulimu ogwokukuma abaana be bona: ate n'amugamba okumusumikiranga olubugo, ng'aseeredde at n'okugerekera omusika entebe. Kale mu nnono ya Jjajja Kirulu Kkerebwe y'asumika alya enjoma ya Kirulu.

Era mu nnono ya Kirulu, Kkerebwe, nga Kirulu aseeredde, yakulira omukolo ogw'okutereka Kirulu. Era Kkerebwe y'abikira Obuganda nti Jjajja Kirulu yaseerera.

Jjajja Kirulu yayongera ku Kkerebwe omulimu omulala ogwokukuumanga emmamba yaffe NAMUNJOLOBE eyabeeranga mu kiddiba Mmamba, mu nnyanga, e Lukumba, Bwerenga.

Mu bukulu buno obwa Kkerebwe era nga yayambalira omulongo wa Jjajja Kirulu, ayitibwa “KAYIZZI”.

Omwana wa Kkerebwe Nankubayaggulo ow'okubiri (2) ye kabona mu kiggwa ky'Omusambwa mmamba Namunjolobe. Era ku mikolo gyonna ejjensonga, nga okwalula abaana ba Kirulu n'okwabya olumbe lwa Jjajja Kirulu n'okukakasa abasika ng'ono yagikowoola Namunjolobe n'ejja n'eva mu kiddiba nemansira amazzi ag'omukisa ku bazzukulu ababa bazze ku mikolo. Era ye kabona we mmamba Namunjolobe mu kika kyaffe.

Ssabalangira Kkerebwe: - Alina abazzukulu bano, ab'ensonga

1. **Omulangira Lukumbi Lutono Zankumbi** omutaka w'e Naggalabi Buddo era nga yemutaka w'e Buyovu, ne Mazinga mu Ssese. Omulangira ono azaalibwa Kitende. Omulangira Kitende e'Kitende ku lwe Entebbe ng'ono y'emwana owe 13 0wa Kkerebwe.
2. **Kabaka Lubala Nkose Mbuubi** e Nkose ono yeyagobera ddala abaziba obutaddayo kutawanya abantu abaali mu bizinga bye Ssese era yalina empingu gy'eyakozesanga okusolooza omusolo, e'Kavirondo Gulf e Kenya, e'Kiziba mu Tanzania ne Burundi. Empingu eyo ye nakazadde w'empingu mu Buganda. Era yalina omuggo ogw'etema gwokka ogwalimu amannyi ag'amusobozesa okufuga. Era Bakabaka bona abasiinga balinanga emiggo eggyo ng'akabonero ak'obuyinza era jjajja Kirulu naye yalina ogugwe, "Ssekkira akubye wakati". Kabaka Lubala Nkose Mbuubi azaalibwa omulangira Lukumbilutono Zankumbi ng'ono ye mwana we ow'o (4).
3. **Omulangira Bukulu bwa Wadda** eyakazibwako erya **Mugula** e Buyira Entebbe Busiro. Era ono ye mwana wa kabaka Lubala Nkose omuberyeberyeye (1), era yeyamusikira. Ngakuze kabaka w'enyanja Mukasa e Ssese yasaba kojjaawe ajje kulukalu, akkalize Obuganda amalenga n'ensonga z'abataka era amubuulirenga n'ebifa eno kulukalu; yalina obuvunanyizibwa ku bantu bona abayingiranga Obuganda nga bayise ku nnyanja. Era ku mirimu egyo egy'okukkaliza Obuganda yalina n'ettambiro. Omuzzukulu ono yagula ekyalo Entebbe yenna ng'amugula ku Walusimbi ow'effumbe eyasengukira e Mawokota.
4. **BUDDO-** Muntu azaalibwa muzzukulu wa Mugula –Bukulu bwa Wadda yali mulwanyi nnyo nga Musawo era ng'agema n'amafumu. Y'ensonga lwaki kitaawe yamuweereza, okuyamba Ssekabaka Kintu, abataka bwe b'amusaba. Ng'olutalo luwedde, Kintu yava e Naggalabi olusozi n'alulekera Buddo, Ssekabaka Kintu n'agenda akuba ekibuga

kye awalala. Era yagamba Buddo nti nkuwadde obuyinza bwonna, era teriba Kabaka atalijja gy'oli. Buddo ng'amaze okufuna obuyinza bwonna ng'agattiddwako n'obuvunanyizibwa obw'okukuma Buganda, yayita mugandawe, Ssewujja ajje amuyambeko n'amuwa ekyalo Kabinja. Buddo bwe yafa mutoowe Mukalazi n'amusikira era Ssewujja yeyamusumika olubugo wano obwa Ssemanobe we bwatandikira. Emirimu gya Buddo omulangira agenda okulya obwa kabaka bamusokeza ewa Budo gwe basanga ng'ali n'omutaka Ssewujja n'amatfumu gaabwe nga bakuma olubiri. Olutalo lwe Ebirumbirumbi ne lulwanibwa, Omulangira bw'amala okuwangula olutalo olwo omutaka Mugema atwala omulangira ewa Buddo (Ssemanobe) n'omutaka Ssewujja, abasanga ku lubiri e Budo – Naggalabi, omutaka Mukalazi Budo (Ssemanobe) n'omutaka Ssewujja babuuza omutaka Mugema nti mwe baani abajja wetukuumira amakula ga Kabaka? Wano omutaka Mugema addamu nti nze Mugema

OMUTAKA GGWAABYA

Ggwaabya mutabani wa Jjajja Kirulu owokuna era yeeyaddanga ku Kkerebwe. Ggwaabya yateranga okubeera ne kitawe Kirulu ng'era yakwata ensawo ya Jjajja eyitibwa 'Mukulu-Awemba' oba 'Namwanjula'. Kirulu yamuwa omulimu guno era n'amuwa ekyalo, Navvule, awo okumpi na kabira 'Kisirikikadde' era buno ne buba obutakabwe. Era Ggwaabya yomu ku Mituba egyo mu kasolya ka Jjajja Kirulu.

Ggwaabya yazaala omwana omu yekka 'Ssekiriwo'. Ssekiriwo ono yafuna obutaka bwe e Mubembe, e Bwerenga.

Era Wanema e Ssesse bweyasindika Omusambwa 'Kisirikikadde' okujja ku lukalu okuliyisa Kabaka Mulondo eggodzi olwa mutabani we Kyobe Ssekakozi (Kibuuka) okuttirwa mu lutalo lwa Kabaka Nakibinge n'Abanyoro. Ssekiriwo ono yeeyasitula Omusambwa guno n'aguleeta e Bwerenga okuva ku nnyanja.

Jjajja we Kirulu yamunenya olwokuleeta ekizibu kino! Era Kirulu yamusindika mangu ewa Kabaka Mulondo gwaba ategeeza ‘Kisirikikadde’ bye yali asaba (oba abanja).



*Kisirikikadde nga bwafanana ensangi zinno mu Makati lye Ssabo akasale
we kasonze*

Ssekiriwo y’ategeeza Kabaka Mulondo nti asabye bino:

Nti amukongojja n’aggula oluggi lwe, amuwe ow’effumbe; olwo abe Ffumbe ne baleeta JANZI SSENTOLE.

Nti amusogolera omwenge gwanywa, amuwe wa Nnyonyi; awo abe Nnyonyi ne bawaayo KALEGA.

Nti omukazi amufumbirwa amuwe ku baanabe bazaala; olwo n’amuwa Omumbejja NDAGIRE.

Nti amukubira e ejjoma ye Kababembe, amuwe wa Mmamba; awo abemmamba ne bamugyamu lugya lwa WAMPONA erinnya lye LUGUNJU.

Nti amukamira amata ganywa, amuwe wa Njaza; awo ne bamuwa MUZIKIZA.

Nti amuweseza akambe k'akwata ayagala wa Ngeye; olwo nga bamuwa WALUKAGGA.

Nti amwerera oluggya lwe amuwe wa Butiko; awo ne bamuwa GALIGOWA.

Abo bona ne batwalibwa ewa Kirulu era ne bafuuka abasiige mu KISIRIKIKADDE e Bwerenga.

Okuva ku mirimu egyo egya Kisirikikadde, Ssekiriwo yafuuka KALAMAZI e Bwerenga; yeeyatumibwanga e Ssesse okunono MUKASA ewa WANNEMA okujja okulagula Kabaka; ate n'e Kyaggwe yeeyagenda nga okusolooza emisolo gy'ekika ate n'okunona embugo ezaziikanga abakulu b'ekika. Ate n'abawala abasiigibwanga eri Kabaka, Ssekiriwo yeeyabanonanga e Kojja ewa Namaaba.

Ssekiriwo yazaala bano:

1. Kafulu 2. Kirunda 3. Sserwavujjanga 4. Wasswa 5. Gandugga
6. Kafulu II 7. Balimba 8. Musoke 9. Dungu 10. Mayinja 11. Kasota
12. Balusaga 13. Wassanga 14. Naluwemba ne 15. Nakibuuka

Enyiriri ez'omutuba gwa Ggwaabya:

1. Olwa Bagenda Muwanga, e Nakawa, Kyaddondo.
2. Olwa Muyanda, e Makokoto, Ssingi.
3. Olwa Wakiwonzi, e Naakukuba, Kyaddondo.
4. Olwa Ssekiriwo, e Mubembe, Bwerenga, Busiro.
5. Olwa Mbirontono, e Mpiringisa, Maya, Busiro.

Mu Mutuba gwa Ggwaabya, Ssekiriwo (Kalamazi) alina Olunyiriri era lulina abantu bangi; era erinnya lino litera okutumibwa abaana abalenzi mu mpya nnyingi; bo abawala batuumibwa 'Nakiriwo'. Obutaka bwa Ssekiriwo buli Mubembe e Bwerenga.

OMUTAKA LUKUMBIRUTONO

Wa Mutuba gwa Kasolya ka Jjajja Kirulu.

Embuga ye n'Obutaka bwe: Matuba, Mpatta, Bukasa, e Ssese, ne ku Kizinga Buyovu E Ssese.

Obuzaale bwe:

Kitende mutabani wa Kkerebwe ow'ekkumi nabasatu yazaala Lukumbirutono.

Lukumbirutono muzzukulu wa Kkerebwe era muzzukulu wa Jjajja Kirulu.

Lukumbirutono yazaala:

- | | |
|------------------------|-----------------------|
| 1. Mawande Ssempagama | 11. Ssenyondwa |
| 2. Ssekitende | 12. Kabudde Kabagenzi |
| 3. Ngolola | 13. Nakibuuka |
| 4. Lubala Nkose Mbuubi | 14. Nakitende |
| 5. Sserubaale | 15. Nansove |
| 6. Tezibonwa | 16. Nnagginda |
| 7. Kiryoyi | 17. Nnambi |
| 8. Mutanda | 18. Namuya |
| 9. Mbuyaga | |
| 10. Ggwanga | |

Emikolo gyakola ku Kabaka

1. Lukumbirutono ye Mutaka Omukulu e Ssese. Era Kabaka Nakibinge bwe yagenda okunona Omulwanyi Kyobe Kyomubazzi ewa Wannema yatuukira wa Lukumbirutono era n'amutuma ewa Wannema. Ate ne Wannema ono gweyatatumanga e Buganda eri Kabaka. Kale Mubaka ku njuyi zombi.

2. Ate mu Nnono y'Emmamba Ennangira Omutaka Lukumbirutono, ku mikolo egyakolebwanga ku kiddiba Mmamba e Bwerenga buli mwaka, nga yayanjula ennyimbe za bazzukulu abaafanga e Ssese, eri Jjajja Kirulu.



OMUTAKA NAMAABA KIYAGA GUTWEGUTWE

Omutaka Namaaba Kiyaga Ggutwegutwe ye mwana wa Kirulu ow'ekkumi n'abasatu (13). Kitaawe yamuwa omulimu gwa busawo era e mmanvu mweyayengeranga eddagala nga eyitibwa Maaba. Okwo kwekuva erinya erya Namaaba eritegeeza Nannyini Maaba.

Awo nga olutalo lwa Konge luwedde, Kiyaga Gutwegutwe Namaaba na sibula kitaawe okujja e Kojja mu Kyaggwe gye yadda nga avudde e Ssisa mu Busiro kitaawe gye yamusimbira omutuba. Namaaba nabaana be (34) ne'empingu eneene enyo ne basabala mu maato ge ne bagoba mu mwaalo Ggaba oba Muwo mu Kyaggwe. Bwe yatuuka mu Kyaggwe nagenda nga asimbira abaana be e Mituba. Yakuuba embuga ye eyasooka e Kabulindiridde weyatema omuggo gwe "Nduddu" era awo nakati wayitiibwa Kiruddu. Embuga ye eyokubiri ye Katyonsanze, eyokusaatu ye Kiiso eri Kagulu e Nsozibiryе, ku lusozi Nakibombe. Namaaba aliko kati ye Lawrence Kkaasa. Ye Namaaba owa asatu mw'omusantu (37).

Omubala gwe guvuga nti: "Ssedume teba nte, eyaakuze aboola". Namaaba lwaziikibwa n'olumbe lwe lwabizibwa. Ejnjoma ze enkulu ziri kumi nattaaano; ezawansi kumi nabbiri eza waggulu satu. Mu zino mwemuli Bunoonya eyamuweebwa Kabaka Kintu; entenga gyebayita Nambogo, entamiivu na maddinda gaayo, ezemibaala nendala. Emituba egiri mu ssiga lya Namaaba e Kagulu-Kojja giri(23).kugino waliwo emituba (9) egy'ennono era nga girina emikolo emitongole gyegikola ku Namaaba.

1. Omutuba gwa Kisimu e Katyonsanze; mu mutuba guno mwe muva omulangira alya obwa Namaaba. Omutaka Kisimu ye Jjajja we mituba gyonna mu ssiga lino.
2. Omutuba gwa Malambaalo e Kiruddu; omutaka ono yasumika Namaaba eddiba ery'ente ennume nga alya obwa Namaaba. Era yamutwaala ku Kiswa namukwasa effumu “Kindittubi” okufumita ente. Era yamukwasa ne ngabo “Lukusense”n’olubugo olw’okubika akabugo.
3. Omutuba gwa Kubikubi e Luwafu-Kojja; omutaka ono yakomaga nokuteekateeka ebiwu bya Namaaba.
4. Omutuba gwa Kaddumukasa e Busaabaga; ono yaasitula amafumu ga Mukasa ag’ebikomo, yakuumma ennyumba “Kavebukasa” mu mbuga Katyonsanze eya Mukasa. Era yasiba Ssabaganzi e Kiyina ku Kasozi “Kojja” okumufuula Omulangira Kojja wa Buganda. Omutaka ono yalya ejnjoma ya Budde mu Kyaggwe era yajjibwabga oluwanga. Emikolo egimukolebwako nga alya obukulu kumpi gyegimu nga egikolebwka ku Namaaba ne Kirulu okwawukanako ne baana banne. Namaaba yamutongoza bwati: yamuwa omukazi ow’emikolo Naabagolola; effumu Kinditubi, engabo Mawerere; olubengo Nabbengo olwatemebwka e Kojja, embwa Kawala ne Mpango; ensawo Mukulu Awemba omwagenderanga ebyuma by’embwa era namuleegera ejnjoma eyiye n’omubala gwayo “Banketaketa”.
5. Omutuba gwa Nabajja-Lugembe e Lusaali-Ddamba; omutaka ono ye mukulu w’empya zonna era yeyaweebwa okukkuma ente Nakitinda eya Nammaba. Ono yaleeta ente ennume eyitiibwa “Kirimalaabagwe” omulangira agenda okulya obwa Namaaba gyafumita.
6. Omutuba gwa Kabangala e Kikubo; omutaka ono yaserekwa ennyumba enkulu mu mbuga ya Namaaba. Enyumba zinno ziyyitibwa Lubugumu ne Kavebukasa.

7. Omutuba gwa Kanogola Busoke; omutaka ono yavaamu “Nakasala” lubuga wa Namaaba. Ono yavunanyizibwa okunogola akaba ku luwanga lwa Namaaba nga asereedde.
8. Omutuba gwa Nampiita e Buyita-Koome; omutaka ono ya kuma ekyoto mu nyumba ya Mukasa mu mbuga ya Namaaba.
9. Omutuba gwa Ggwemba e Mmengo; omutaka ono yatwaala omubiri gwa Namaaba nga aseredde mu lusuku Mbiko namukuumma ennaku musanvu awo Kanogola nalyoka akola omulimu gwe.
10. Omutuba gwa Ssekato e Kiruddu; omutaka ono ye mumbowa wa Namaaba. Yakuma embwa za Namaaba-Bujingo ne Mujoona. Embwa zinno zezirya emmereNamaaba gyalemeddwa. Era ono yatwaala omubiri gwa Namaaba okuguziika mu Kibira.
11. Omutuba gwa Nsimbi e Kiteza
12. Omutuba gwa Musizi e Busimbe-seeta
13. Omutuba gwa Ddanze e Mulanje-Ngogwe-Busegulu
14. Omutuba gwa Kiyiima e Kiwumu-Busiro
15. Omutuba gwa Magere e Ntanzi-Kyaggwe
16. Omutuba gwa Njabire e Mitala –Koome
17. Omutuba gwa Kibomba e Ddamba-Koome
18. Omutuba gwa Kitere e Bugonzi Buddu-Masaka
19. Omutuba gwa Kyanja e Busubi-Kyaggwe
20. Omutuba gwa Matte e Mbute-Mawokota
21. Omutuba gwa Muzza e Kasayi-Kyaggwe
22. Omutuba gwa Kabi e Luwenda-Koome
23. Omoutuba gwa Mbuge e Bugiri, Kyaggwe

Emirimu nya Namaaba ku Kirulu:

Namaaba yanooga n'okusekula obulezi bwa baana nabazukulu ba kirulu. Namaaba yavaamu Kisirikikadde akuumma Kirulu era nga yagenda ne mukazi we Ndagire mu lyato lyaabwe Bwaagu.

Emirimu gya Namaaba eri Obuganda bwonna:

Omutaka Namaaba yasiba Ssabaganzi e Kiyina okumufuula omulangira asobole okutwaala omulangira anaalya Engoma ya Buganda. Omukolo guno agukolera ku Kasozi Kojja nga alagira Mutabani we Kaddumukasa okukola omukolo ogwo. Omutaka Namaaba yavamu omulangira Nfudu Kibomba “Omugabe” ono ye mwana wa Namaaba owa (33) era yeyagabibwa okukulembera olutabalo olwagoba Kabaka Bbemba mu Buganda. Bamukwasa e kitala Kanonya. Era Nabajja-Lugembe omwana wa Namaaba yakuuma amayembe (2) Nfudu geyatabaaza Bbemba. Gayitibwa Kalondoozi ne Nakasawula. Amayembe gano gajjibwa Busawula e Katale. Era Nabajja-Lugembe yakuuma e Kitala Kanoonya Nfudu kye yakozesa okujjako Bbemb omutwe.

Omutaka Namaaba yavaamu omuzaana Kannyange muzzukulu wa Kaddumukasa.

Era Namaaba yeyatawulula enkayaana eziba zigude mu baana b’engooma mu bwa Kabaka bwa Buganda. Ssekabaka Kagulu tebucwereke bwe yalwana ne baganda be Mawanda, Kikulwe ne Nnlinya Ndagire Nassolo Maaso Ndege; Namaaba yeyabatwaulula era yasimab e Jjembe “ Ntakasukwa” eryabatawulula. Era Ssekabaka Mwanga naye bwe yakayaana na balangira ewa Namaaba gye yadukira era nafunayo ne ngoma oluvanyuma nezigyira mu lubiri mu 1966 mu lutaalo.

Yeyakuumma Kabaka Kagulu mu mbuga ye ekitundu ne kifuka “Kagulu”. Era Namaaba yaweebwa obuvunanyizibwa bwa kukuumma SSABAGANZI okuvira ddala ku Kabaka Mawanda . Awo ekitundu kyona ne kifuuka “ KOJJA”. Era awo weva ffe okulayira nti “TULI BAZUKULU BA NAMAABA KIYAGA GUTWEGUTWE E KAGULU-KOJJA”

Namaaba yakuuma e Mbuga enkulu eya Katyonsanze omuli omusambwa gwa Kabaka Katyonsanze , mukulu wa Kabaka Bbemba Musota. Era nga mwemuli ne Ttimba Sserwanga eyagaba nga oluzaalo.

Abalangira abasereedde mu mwaka 2011:

Omutaka Kisimu(omugenzi Muwanga John Baptist) e Katyon sanze.

Omutaka Matte (omugenzi Nsubuga Kityamuweesi) e Mbutte Mawokota.

Omutaka Kaddumukasa (omugenzi Deo Lusaalu)e Busabaga.

Omutaka Nsimbi(omugenzi Kaggwa Charles) e Kiteza-Seeta.

Ebikulu ku Namaaba:


Nga alya obwa Namaaba afumita ente, era omukolo gunno gukolebwa ku bantu banno bokka mu Buganda:

Omulangira alya obwa Kabaka bwa Buganda; Jjajja Kirulu e Bwerenga-Busiro.

Omutaka Kaddumukasa mutabani wa Namaaba asiba ekiyina kojja wa Kabaka okumufula omulangira era Ssabaganzi kojja wa Buganda.

Namaaba takwata muntu yenna mulala mu ngalo okujjako Ssabasajja muzzukuluwe era ne Kirulu kitaawe.

N.B Akwata Kabaka mu ngalo nga amusindika mu lutabaalo.



OMUTAKA MULINDE

Omutaka Mulinde Naggenda Gerula owa asatu (30) mu Kiyaga Gutwegutwe, Kitaawe Kiyaga yamuwa ekyalo Mulajje kiri Kyaggwe ne guba Omutuba gwe.

Omutaka Mulinde yazaala abaana bano era n'abawa ebyalo era n'abasimbira Emituba:-

1. KIBUNGA e Masaka kumpi ne Nsube, Kyaggwe.
2. KAMYUKA e Zziiru (Kizinga) kiri Kyaggwe.
3. SSEMULEMA e Kiziba kiri mu Kyaggwe.
4. KANAABI e Ntovu kumpi n'e Katwe Kyaggwe.
5. KADDUKIBUUKA e Bukasa kumpi ne Nkokonjeru Kyaggwe.

6. KIBERU e Namaliiri kumpi ne Nkokonjeru Kyaggwe.
7. LUGOBWA e Ngulumu kumpi ne Katwe Kyaggwe.
8. KATULUGU e Nnemerwa Kyaggwe.
9. MANGAALA e Kyaato Kyaggwe.
10. MATEMBE e Ndolwa Kyaggwe.
11. BUWALAZA e Kikusa/Kiwalee Kyaggwe.
12. TIBUSIMBA e Kizigo Kyaggwe.
13. KABENGWA e Nsasa Kyaggwe.
14. BUKUSUBE e Bukisi Kyaggwe.
15. KALE e Ssaggaana, Ssi, Bukunja Kyaggwe.

Saagala olowooze nti amanya gaddiringana mu bukulu bwabwe.



*Omutaka Phillip Mulinde nga ateesa mu
nkiiko ezituula buli lwa Sande
olusembayo mu mwezi ku biddiba e
Namulanda*

OMUTAKA KISUZE



Omutaka Kisuze mwana wa Nfudu. Nfudu yazaala abaana be bataano era bebano:

- 1- Kisuze e Katwe Nakawuka mu Busiro
- 2- Kabonge Semukuni e Nakawuka mu Busiro
- 3- Kasasa Katagye e Mpondwe Mawokota
- 4- Ndagire
- 5- Kumikumi mwanyinabwe

Nfudu bwneyaffa mutabani we Kisuze namusikira era nawebwa ne Ssiga era bano bebaana be bazaala;

- 1- Buwule Katwe
- 2- Kasozi Kabenge
- 3- Ddamba
- 4- Kaye
- 5- Nasirye
- 6- Kaliiba
- 7- Kambugu
- 8- Misagga
- 9- Ssemakolo
- 10- Ssempiira Ssenfuma Ssekanyike
- 11- Nakaye
- 12- Nakaliiba
- 13- Nakawuka
- 14- Nadamba

Omutaka Kisuze yaasimba eKikajjo ekirwanyisibwa olutalo lwebirumbirumbi nga Kabaka agenda okutikirwa era ayina nemirimu emilara minji jakola.



OMUTAKA SSENFUMA SSEMPIIRA

Omutaka Ssenfuma yemwana wa Kisuze ow'ekumi.

Awo mumulembe 16 nga Ssekabaka Kimera y'alamula obuganda, yali agenda ewa Ndugwa okumukolera ekiwu nga akalombolombo bwekali nti Ndugwa y'akola ekiwu nga Kabaka tanatula ku Namulondo. Kabaka nalaba ensuku ezigudde akaleka ku byalo Nsagu, Maya ne' Nsangi. Awo Kabaka n'abuuza beyalinabo nti "ensuku ezo zaani? Nebamuddamu nti z'amusajjavo Kabonge Ssemukuni ow'eMmamba e Nnangira.

Kabonge bweyamanya nti Kabaka y'egombye ensuku ze, n'amuwako lumu. Omutanda yassanyuka nnyo era okuva olwo n'amufula mukwano ggwe. Bwewayitawo ebbanga, Kabaka yakomawo ewa Kabonge n'amugamba nti 'laba mubaana bo abalenzi ow'empisa enungi muwe lubuga wange amulere era anonye awantu wona w'ayagala okubera n'omumbejja'.

Kabonge Ssemukuni yagenda n'ategeeza baganda be Kabaka by'amugambye. Bonsatule ne'balonda Ssenfuma Ssempira y'aba aweebwa omumbejja. Bwatyo n'agenda e' Kanyike n'omumbejja gwe bamuwa.

Omumbejja Byanjeru Nattu yamuzaalamu abaana musanvu:

1. Sota
2. Kakaba
3. Mulagusi
4. Sserumaga
5. Nakabunda
6. Nankunda
7. Mayanja

Omutaka Buwule Musoke Ssenfuma II nva mu Mulagusi omwana wa Ssenfuma Ssempira ow'okusatu. Eno yenono y'esiga lya Ssenfuma Ssempira e'Kanyike.

Yazalibwa Joseph Wasswa Kanyike

Era muzukulu wa: Tanansi Buwule Musoke Ssenfuma I

Augstino Ddamba Ssenfuma


Kizza Buddebubi

Kanyike

Mulagusi
Ssenfuma Ssempira
Kisuze
Nfudu
Kiayaga Namaaba
Kirulu (Ye Jjaja wa Kasolya ke Mmamba e Nnangira).

Gino gye mituba egikola esiga lyा Ssenfuma Ssempira e Kanyike wamanga:

1. Mulagusi e'Muyira , Mawokota
2. Nankunda e'Bukasa, Kyaddondo
3. Nakabunda e'Kinoni, Busujju
4. Mayanja mu Luyiira, Bulemeezi
5. Lufuga e' Namakata, Kyaggwe
6. Lutuga e' Luvumbula, Mawokota
7. Kasasa e'Gombe
8. Kasantamu e' Masambira
9. Ssebwato e'Busujju
10. Kisiriza e' Bujumba
11. Wakasonko e ' Katiti
12. Kambugu e' Nabbingo
13. Gabunga e'Ggangu Bulemeezi
14. Kyaliwajjala e'Masambira
15. Ssemukono e' Buyinja
16. Kiddukanya e' Bukasa, Busiro
17. Muluuma e' Kiwanda, Singo
18. Sseruttu e' Mizigo, Mityana



OMUTAKA NKOOLA

Omutuba gwa Nkoola obutaka bwaagwo buli
Namabo Mawokota. Guzz e gusikirwa abantu

bangi era nga bayitibwa Nkoola. N'olwekyo ba Nkoola babadewo banji ku Namabo naye Nkoola asembayo ghetumanyiiko ebyafaayo amalaalo gge nekaakati gyegali ku butaka eNamabo. Nkoola ono yaliwo mumyaka egisuka mukikumi mw'ataano (150) okuva kati. Bweyafa n'asikirwa Mankampa ate Mankampa n'asikirwa Daudi Nkoola aliko kati.

Kisaana kimanyibwe bulungi nti mumyaka minjiko emabega muzzukulu wa Kiyaga erinyarye Muzira yajja n'asenga ku Namabo era emyaka bwejayitawo ab'olulyolwe nebatta omukago n'aba Nkoola beyasanga ku Namabo. Ensonga eyaleeta muzzukulu wa Kiyaga asenge ku Namabo tuja kujiraba mumaaso. Kalenno omukago ogwo gwatiinta nnyo n'okutuuka okuwanyisiganya abasika, nekiretera n'abantu okulowooza nti ab'emamba bona abaali ku Namabo bakika kimu ekitali kituufu nakatono, anti aba Nkoola baali bakyalimu okusonyiwazibwa nga batya okwejjayo mulwatu nti bava mu Kirulu olw'okuboolebwa okwava ku mulembe gwa ba Ssekabaka Ssemakookiro, Kamaanya ne Jjunju abe'mmamba ennangira lwebayigganyizibwa ennyo Yensonga lwaki baatuuka n'okukola ensobi ennene ennyo Namakaka owa Nkayuse ne bamusikiza Mankampa ow'omutuba gwa Nkoola. Aba Kiyaga bbo baalina ekigendererwa ky'okwezza obukulu bwoku Namabo n'okwerabiza aba Nkoola nti bava mu Kirulu nga bakozesa omukisa gwokutta omukago. Naye omutaka Kalori Kizito Ssalongo e Mitweetwe nga tannafa nga bali wamu n'omutaka Daudi Nkoola Ssalongo ow'omutuba baakola omulimu munene nnyo ddala okulaba nga batereeza ennono yaffe, okuzawula n'okuzzaawo omutuba gwa Nkoola. Twebaza nnyo baJjajafe Yozefina Nakato ne Gabriel Wasswa bebagamba nti bebaasinga okulabuukirira eby'omukago nebababulira ekituufu nti ffe tuva mu Kirulu wewaawo nebajjajja abalala baabyogeranga naye nga babikisa olwensonga y'omukago ogwali gubatuusiza nokutuzaaya. Kino kyekyatanula abakulu bano bombi okufaayo ennyo okutereeza ennono ye Namabo. Baanoonya Jjajja Kirulu eyali yabagambibwa bajjajja nti mwetusibuka okutuuka n'okuteeka ku nninga omukulu we kika kye Mmamba Namakaka Gabunga eyali

atwezzizza, abalage jjajjaabwe Kirulu mwebasibuka. Kino Gabunga (Yosiya Kasozi) kyamukalubirira nnyo kubanga yye yali atufudde bamutuba ogwetukira mukasolyake. Naye bwebamulemerako kwekukkiriza nabalaga jjajjaabwe Kirulu gwebaali baagala kubanga gwebaali bamanyi eyababuulirwa bajjaja babwe nti mwebasibuka. Era Kirulu teyalwa naatongoza omutuba gwa Nkoola. Bwetutyo netuzawuka gyetwali tubulide. Era n'omulimu gw'okuzzawo akasolya ka jajjaffe Kirulu tugwenyigidemu nnyo okuva ku ntandikwa yagwo era tugwenyumirizaamu nnyo.

Omulimu gwa nkoola mu bwakabaka bwa Buganda

Omulangira omu mu bwakabaka bwa Buganda yali alemeddfa okuzaala. Abe Mamba eNamabo nebamuwa eddagala n'azaala abalongo (omumbeja Kyoyiga n'omulangira Kataabu) yasalawo abalongo okudda abamalire eNamabo wamu n'okubasiba. Omugugu gw'abalongo gwasigala Namabo nga aba Nkoola bebagukuma era nebaguzimbira n'olubiri ku Namabo ,olwayitibwanga BUYIGGA era nga ffe aba Nkoola ffe twalulinako obuyinza okulukuma wamu n'omugugu gwa balongo abo ogwalimu. Era oluvanyuma lwa Buganda okutaagulwataagulwa gavumenti y'omumpeembe Obote omugugu ogwo gwatwalibwa mulubiri e Mpunge nakati gyeeguli.

Olubiri Buyiga ku Namabo

Olubiri Buyigga lwafuula omutala Namabo okuba eky'omuziro okuzindibwa mulutalo lwonna mu bwakabaka bwa Buganda kubanga lwalimu omulangira n'omumbeja. Nga bwenakusuubizza wagulu eno yensoonga lwaki muzukulu wa Kiyaga yajja asenge ku Namabo kubanga baali baagala kumutta olwe ntalo ezaali zigenda mumaaso mu kiseera ekyo mu Buganda

Omutaka Nkoola alina ennyiriri Ttaano

- 1) Ssekkalaba e Namabo Mawokota era nga lwe luvaamu Nkoola alukulira ye Ssalongo Kizito Nabugoe Kangulumira Bugerere.
- 2) Wambuzi e Buyaya Mawokota – alukulira ye Kizito e Kabuye Kyabadaaza- Butambala.

- 3) Ssalimu Kasajja e Zirobwe Bulemeezi alukulira ye Miisi Nsubuga.
- 4) Ntala Zigwe e Namabo Mawokota alukulira ye Yakobo e' Zirobwe.
- 5) Ssaadi Ssebalemba e Gombe Butambala - alukulira Wamala e Gombe.

OBUZAALE BWA BUKULU BWA WADDA – MUGULA

Erinnya Entebbe ly'atandikira ku Bukulu bwa Wadda (Mugula) olw'entebe gy'eyajja nayo. Ng'akabonero ak'obuyinza gy'eyatekanga ku mayinja amanene ng'alamula. Era mu mbugaye mwe muli ekyoto Buganda Buladde era mutabani we Ttaka y'eyali kabona mu kiggwa ekkyo. Kati mu kiseera kino ow'olunyiriri Kiberu Sserwajj'okwota y'akirabirira bazzukulu ba Bukulu bwa Wadda (Mugula) bano (1) Budo, Ssewujja e Buddo balina obuvunanyizibwa buno e Naggalabi mu kuteekako omulangira agenda okulya obw'akabaka.

Erinnya ettuufu erya Mugula ye Bukulu Bwa Wadda azaalibwa Kabaka Lubala Nkose Mbuubi, e Nkose Ssese.. Erya Mugula yalipaatiikibwako olw'okuba yagula ekitundu kati ekiyitibwa Ntebe okuva ku Walusumbi owe Ffumbe eyogenda e Lwanga Mawokota. Era ye Mwannyina wa Nambuubi Nabulesa eyafumbirwa Mairwe Jjuzi (Wannema) n'azaala, Mukasa Kabaka w'enyanja. Emmamba Nnamunjolobe, Mugula gy'eyeddira Nnangira olw'okubanga obuzaale bwa Mugulu-Buluku Bwa Wadda, busibuka mu Kirulu e Bwerenga mu ba Kabaka ba Buganda abaasooka, mu Luse lwa Bukadde Bukokooma.

Azaalibwa Bukuku Omuwumbya Ngabo, azaala Ttonda, ate oyo n'azaala Wemba Ssekugulu Kumu-Ggulu n'azaala Kabaka Kagulu, azaala Kabaka Kirulu. Kkerebwe omwana ow'okusatu azaala Kitende n'azaala Lukumbi Lutono-Zankumbi Omutaka omukulu ow'eNaggalabi – Buddo. Oyo n'azaala

Lubala Nkose Mbuubi e Mazinga Ssese, azaala Bukulu Bwa Wadda (Mugula) Entebbe Busiro, azaala aba Kayiba Ttaka, n'azaala (1) Kiberu Sserwajjokwota, (2) Ssekalaala, (3) Ssemukadde, (4) Bugimbi (5) Ssentala Kaasamitala (6) Ggwanga (7) Kuku ne (8) Nabbindi. Mugula – Bukulu Bwa Wadda yazaala abalenzi bana (4);

- ❖ Kaggwe e Bukaggwe (Bugonga – Nakasamba – Kitaba.
- ❖ Taka yafa tazadde
- ❖ Kayiba yasikira mugandawe Taka n'agatta amanya gombi n'afuuka Kayiba-Ttaka e Buira Ntebe. Ono yatuuza Mugu..... mu ntebe.
- ❖ Sserugunda Nsubuga Lubuzibwa e Kigungu Ntebe
- ❖ Omuwala – Nakya e Misoli Ntebe.



Wano omutaka Kayiba Ttaka ng'annyonyola era ng'abuuza, Omutaka Sserwanja Charles ob'anasobolaokukulebera e Ssigi lya Bukulu Bwa Wadda (Mugula) abalala abali mu kifaananyi kino y'emutaka Kisubika KuFa Maaso-Katikkiro w'omutuba gwa

Kayiba Ttaka, ne Kibuuka Charles omuwandiisi w'olunyiriri lwa Kiberu

Sserwajjokwota mu mutuba gwe gumu nabarala

Bukulu Bwa Wadda (Mugula) yeddira Emmamba Nnamunjolobe e Nnangira Nansangwa ey'omu Kidiba e Luwunga – Bwerenga Busiro. Mugula (Bukulu Bwa Wadda) asooka teyatuumibwa Mugula lwakuba yagula ennyago n'edda. Yatuumibea erinnya ly a Mugula kubanga yagula eky'ondo ekiyitibwa Ntebe ku Walusimbi ow'Effumbe, eyasengukira e Mawokota.

Embuga yaffe eya Mugula-Bukulu Bwa Wadda eri Entebbe Buyira – Busiro. Kintu okulya obwa Kabaka, Nalwoga ow'eNsazi mwannyina Bukulu Bwa Wadda – (Mugula) ye yali Lubuga. Omutaka Mbaziira bweyalii atikkira Kintu yategeezza nti Mugula Bukulu Bwa Wadda mwana wa Kabaka Lubala Nkose Mbuubi e Mazinga Ssese.


Bukulu Bwa Wadda bwe yafa yasikirwa mutabani we Sserugunda. Naye olw'okuba yali muto, Kaggwe yaweebwa obukuza. Mu bukuza obwo, Kaggwe mweyaliira ensowole ey'obwa Mugula. Kaggwe bwe yafa abakulu nebateesa okwewala ekikolwa kya Kaggwe, obwe



Wano nga Bukulu Bwawadda (Mugula) agenda okuttuuzi bwa ku ntebeye ng'omukolo ogwo gw'akolebwa omutaka Kayiba Ttaka nga 17.10.2010

Ssiga lyा Mugula buliibwe nga mu Mpalo, okuva mu Mituba esatu gyokka-Kaggwe, Kayiba-Ttaka ne Sserugunda era bwekibadde era bwekiri n'okutuusa ku ssaawa yaaleero.

1. Bukulu bwa Wadda bweyafa, mutabaniwe Nsubuga Lubuzibwa Serugunda n'amusikira n'alya n'obwami obwa Mugula Entebbe mu Busiro.
 - i) Bukulu bwa Wadda ye Mugula eyasooka era gwe mutuba gwa Serugunda.
 - ii) Nsubuga Lubuzibwa Serugunda, Mugula Entebbe yasika era n'abulya.
 - iii) Ssebuko, Mugula Entebbe yalya buli.
 - iv) Mubiru Kajjebedde, Mugula Entebbe yalya buli.
 - v) Ddibalikaze, Mugula Entebbe yasika era n'abulya.
 - vi) Mukasa Maiba, Mugula Entebbe yasika era n'abulya.
 - vii) Nsubuga Bikutula, Mugula Entebbe yasika era n'abulya.
 - viii) Alubera Nsiro Wakaanya, Mugula Entebbe yasika era n'abulya.
2. Bano beebakalya obwami obwa Mugula abasalibwa mu mutuba gwa Kawe:
 - i) Kagwe-ensonyi Gulanyago, Mugula e Ntebbe Kalya buli.
 - ii) Kijongolo Nabagagya, Mugula e Ntebbe yalya buli.
 - iii) Bbunga Basetikal, Mugula e Ntebbe yalya buli.



Wano Omutaka Sserwanja Charles nga Kyajje atuuzibwe kubwa Mugula

- iv) Wakatuntu, Mugula e Ntebbe yalya buli.
- v) Tantali, Mugula e Ntebbe yasika era n'abulya.
- vi) Ssemakato, Mugula e Ntebbe yalya buli.
- vii) Makayu, Mugula e Ntebbe yalya buli.
- viii) Enoka Musajaalira, Mugula e Ntebbe yalya buli.
- ix) Basiriyo Kategaya Mukasa, Mugula e Ntebbe yasika era n'abulya.



Mugula nga bagenda mu lyato ne Kayiba Ttaka, Kasiga e Bbendegere, bagenda ku mayinja agali mu nnyanja Namiryango ne Nsimbi Bukulu Bwawadda(Mugula) we yatuukira

3. Bano bebakalya obwa Mugula abazaalibwa mu Mutuba gwa Kayiba-Ttaka:-

- i) Ssengo, Mugula e Ntebe yalya buli.
- ii) Mbuzibatwale, Mugula e Ntebe yasika era n'abulya.
- iii) Serwanja, Mugula e Ntebe yasika era n'abulya.
- iv) Namwanja, Mugula e Ntebe yalya buli.
- v) Ssemuwemba, Mugula e Ntebe yalya buli.
- vi) Basajjankambwe, Mugula e Ntebe yalya buli.
- vii) Zigwanemiti, Mugula e Ntebe yalya buli.
- viii) Ssendikwanawa, Mugula e Ntebe yalya buli.
- ix) Ssalimu Kidze, Mugula e Jungo yalya buli.
- x) Zabuloni Kiridebwami, Mugula e Jungo yalya buli.




*Empuku Banga e Buyira Entebe era jjajja Bukulu Bwa Wadda (Mugula) Mweyasoka
okugula ng'agobye mu kifo ekyo era ekyoto Buganda Buladde wekikumirwa*

OMUTAKA MUNOGA

Ono ye Munoga Yowana Lwanga Ddamulira owabiri
mwo musanvu (27) okuva ku Munoga Kikonyogo
Mulyabisuubi eyasooka Mutabani wa Kirulu Sendijja II
era wa Mutuba mu kasolya ka Kirulu.

Emirimu gya Munoga ku Kabaka ne Buganda



Munoga mukomazi wa **Lubugo Lwetemme** era yatandika okomaga olubugo olwo okuva ku Kabaka Katereggga. Munoga yasooka okutwala ETTEME e Buddo nga Kabaka agenda okukula. Era omukolo ogwo yagukola ne ku Kabaka Mutebi Muwenda Ronald II. Munoga yafuna omulimu ogwo oluvanyuma lw'okomagira obulungi Kabaka Katereggga. Kabaka yamuwa ensamu eyesanga ekomaga amanya gayo:

1. Nakakizi
2. Wakayamba

Kabaka bwe yaali nga alambula o'Buganda omutaka Munoga yeyanjura era namukwas ensamo eyesanga. Kabaka yagimudizza namugamba nti dayo onkomagire nga embugo.

Namuwa n'empiso amanya gayo:

1. Azaala ekibi alyoyerera basesi
2. Nseko ziwedde

Kabaka Katereggga ywa Munoga embazi erinnya lyayo **Sinakakombako**, namuwa embwa erinnya lyayo **Balikalaba**, namuwa ne *ejyoma* erinnya nga omubala gwayo gwe osoose **Obuliika** namuwa n'omutala **Ntolomwe nebufuka** obutaka bwe okuva olwo.

Era oyo abeera kumulimu gwo kukomaga Etteme ebya bakyala alina okubyesonyiwa mukaseera ako nga Etteme liyita mu mitendera.

Zino wamanga zenyiriri eziva mu Munoga:

1. Ddagilira
2. Kiwuube

Omutaka Buzigi ava mu Munoga era kati wa Mutuba mu kasolya ka Kirulu nga n'obutaka bwe buli Lufuvu-Busiro.

EBYAFAAZO BYE BWERENGA MU MYAKA NGA 110

OKUSENGUKA OKUVA E BWERENGA

Mu myaka 1901 – 1902 obulwadde bwa Mmongoota bwazinda ebitundu by'olubalama lw'enyanja Nalubaale era abantu bona abaali eyo ne basenguka, abamu neb agenda mu bitundu ebyewala nga e Ssingo. Mu ban one JJajja Kirulu Ssinagabula II Kintu mweyagendera e Ssingo.



Katikkiro wa Buganda oweekitiibwa JB Walusimbi nga akwasa Omutaka Kirulu certificate y'okuzzawo amasiro gaBuganda mu Bulange-Mengo nga 23 August 2011

ENKYAYAANA KU BWAKIRULU

Nga Mmongoota aweddewo ku lubalama lw'enyanja abantu baatandika okudda ewaabwe naye bajjaja abaagenda e Ssingo baalwawo okudda. Naye abo abaali okumpi n'ekibuga Kampala baddayo mangu; era mu bano mwemwali ne Lubato Lugoloobi Kugambwa, ava mu Mutuba gwa Nkwangu e Kawuula, Bwerenga, Mutabani wa Jjajja Kirulu owokutaano.

Ono bwe yadda e Bwerenga nga ne mayiro zikubiddwa nga yessa ettaka ly'onutaka n'obwakirulu!

SSABATAKA ASALAWO

Bajjajja abaali bagenze e Ssingi bwe badda nga bakayanira Bwakirulu bwaabwe. Omusango gwawaabwa mu kika, nga Yisaaya Gannyana yawawabira Lugoloobi. Omusango gwasinga Lugoloobi era n'ajulira eri Ssabataka, KAbaka wa Buganda, Dawudi Ccwa II.

Ssabataka Dawudi Ccwa II yasalawo nga 21 March 1928 nti “GANYANA YEWOMUSAAYI GWA KIRULU E BWERENGA”.



Abalingira na bambejja abeddira emmamba ennangira abaliwo ku mukologwokumanyagana nga 11December 2010, e Namulanda

EKIKA KYE MMAMBA KIVUDDEMU EBIKA EBIRALA BINGI

Ekika kye Mmamba kyazaala ebika bino:

1. Ekye Mbwa
2. Ekye Ngeye
3. Ekye Ndiga
4. Eky'Olugave
5. Eky Nkima (ne Ngabi)
6. Ekye Nvuma
7. Ekye ηnjonge
8. Ekye Njovu (ne Nvubu)
9. Ekye Kkobe
10. Ekye Njaza
11. Ekye Nsanafu
12. Ekye Nkejje
13. Ekye Mpeewo
14. Ekye Mbogo
15. Nebirala

Ate ekye Ngeye ne kizaala:-

1. Ekye Nsenene

Ate ekye Mbwa ne Kizaala:-

1. Ekye Ffumbe
2. Ekye Ngo
3. Ekya Kasimba

Ne birala bwe bityo.

OBULANGIRA BUKOMA

Naye ebika bwe byavanga mu mmamba ennangira, Namunjolobe, Obulangira bwaabyo bwakomangaawo, tebyagendanga nabwo! Wabula basiganza nga emituba emirangira wamu ne Ssaalangira nga bwe kirabikira mu bika byonna ebyava mu mmamba ennangir nansangwa mu Buganda. Era

n'olwensonga eyo omutaka Nankere ow'akasolya k'emmamba Kakobooza tasanye kweyita omukulu wakasolya ke mmamba ennangira nga bwekibadde kikolebwa mu nsangi zinno.

Enkookeero 1: Okuserera Kwa Ssablangira Kkerebwe Mutebi Lawrence

Eri abalangira na bambejja mwena tubabikira okuserera kwa Ssablangira Kkerebwe, Lawrence Mutebi Ssekalega (mu kifananyi). Yaseerera nga 6 December 2011 era n'aziikwa nga 7 December 2011 e Ddundu, Bwebaajja mu Busiro.

Omugenzi Lawrence Mutebi yazaalibwa mu 1944 e Ddundu, omwami Adulufu Musoke Kiyaga no mukyala Irene Nankinga.

Yasomera mu Lubiri S.S era gyeyava nagenda mu Ttendekero ly'obusawo e Mulago. Era Bwemayala yaakolerako mu bifo bino:

- Kayunga Hospital
- Entebbe Hospital
- Lweza Parish, St Magdalene Health Center
- Namulundu Medical Center, Kajjansi gyabadde akolera.

Omutaka yakuuma obwa Kkerebwe ng'omusigire okumala emyaka 19, okuva 1976 okutuuka 1995 nga mukulu we Yesero Kampala Ssekalega abulidde e Ssingo. Oluvanyuma Kkerebwe Yesero yasalawo obukulu abukwase mutoowe Lawrence Mutebi. Era Mutebi yasumikibwa okuba Kkerebwe nga 9 December 1995 e Ddundu, Bwebaajja. Omugenzi akuleembedde Omutuba guno okumala emyaka 16.

Era mu biseera ebizibu ne mbeera yobukosefu ebbanga lyonna, nendwadde ye Ntunnunsi awerezza n'obunyikivu o'buganda, n'akumaakuma e Kika n'obumalirivu.

Omugenzi Mutebi yabadde omumyuka w'akakiiko k'obwa Kirulu mu Kasolya ke Mmamba eNnangira akassibwawo mu 2009 mu kawefube w'okuzawulula e'nnono yaffe.



Omugenzi anajjukirwanga olw'omulimu ogwe ttendo gweyakola mu kakiiko ak'ennono ak'abataka ab'obusolya mu 1993 nga obwa Kabaka bwa Buganda buzzibwawo. Omugenzi yayali omusaale mu kulambulula ennono z'obwakabaka bwa Wannema e Ssese n'obwakabaka bwa Buganda, abamu gyebaali babuusizza amaaso.

Mu ngeri yemu, omugenzi alafabunye nnyo okutangira ensowole ezizze nga zegwanyiza obwa Kirulu. Bwatyo abadde mpagi luwagga mu kulambika ennono y'oluse lwa Kabaka Tonda, obwa Kirulu mwebusibuka, ekisobosezza abantu bangi okumanya enkata y'obwakabaka bwaffe ebwensikirano eya Kabaka Kintu. E kivude mu bino ye Jjaja Kirulu okukulemberamu abaana n'abazzukulu be okukiika enfunda eziwerako ewa Kamalabyona mu Bulange gyabadde ayitibwa okugumiza ensonga zino.



Omutaka ngali ne mutabani we Kizito Lawrence nga akuba omubala ku mukolo gokumanayagana nga 11 December 2010



Omutaka Kkerebwe Lawrence Mutebi ayimiridde nga ateseeza ekika kye mu kukiika embuga nga 15 November 2011, mu Makati ye Katikkiro wa Buganda oweekitibwa JB Walusimbi

Kyakusaalirwa nti Ssabalangira Mutebi atuvudde ku maaso nga kyalwaniridde ebbanga eddene kati kirabika kyengedde. Naye tusigadde tuli bagumu mu mitima gyaffe nti omusingi gwatulekedde guja kutusobozesa okumaliriza omulimu guno.



Omutaka Nabajja Lugembe n' omutaka Serugo Luutu B Mukasa (Ssentebwa wa Kakiiko ke nnono ye Mmamba eNnangira nga batwala ekita ky'omwenge okubikira Obuganda okuseerera kwa Ssabalangira Kkerebwe nga December 21, 2011



Katikkiro wa Buganda JB Walusimbi nga nkwasibwa ekita ky'omwenge ku Wankaaki wa Bulange abalala abaliwo Omutaka Serugo, Omutaka Nabajja Lugembe, omuwandiisi wa Kasolya Eng. Nsubuga Makande Dick

Gutusinze nnyo ayi Ssaabasajja, Katikkiro wa Buganda, Jjajja Kirulu, abenju ye, ab'oluganda, abako n'emikwano. Tusaba lugaba Nnamugereka ffena atusibe ekimyu eky'obuvumu n'obumalirivu mu kaseera kano akazibu.

Tusaba Omukama awe Lawrence Mutebi ekiwumulo eky'emirembe n'ekitangala eky'olubeerera kimwakirenga.

Omwami Gerald Nsubuga Namaswaala muto w'omugenzi yalondebwa okusikira mukulu we ku kifundikwa kya Kkerebwe era nafuuka omutaka Kkerebwe e Lukumba, Bwerenga Ssabalangira we Kika kye Mmamba ennangira mu Buganda.

Enkookeero 2: Obwakabaka Bwa Buganda Obwasooka

Ensi Bulama yatandika, abazungu kye bayita mu mulembe ogusooka naye nga okugoberera Kristo tekunatandiika, awo mu 300 A.D.

1. Kabaka Muntu e Kiwawu, Bweera Busujju ye yatandikawo obwakabaka mu nsi Bulama eyafuuka Buganda. Mu nsikiragano ey'obusimbalala awatali mirerembe tukoma ku Kirulu, bakabaka abalala ba matabi.
2. Kabaka Bukadde Bukokooma mutabani wa Muntu. Amasiro ge gali Nnaggalabi Buddo.
3. Kabaka Bukuku Omuwumbyangabo e Makukuuku e Mbaale Mawokota.
4. Kabaka Tonda e Butonda nga eno gyeyazikiibwa nga olubiri lwe luli Busomba, Mbaale Mawokota.
5. Kabaka Wembala Ssekugulukumu Ggulu – Ssenene, Mawokota
6. Kabaka Kagulu e Nnanziga - Busiro
7. Kabaka Kirulu e Bwerenga – Busiro
8. Kabaka Konge e Konge – Mawokota
9. Kabaka Ssemweezi Maganda e Konge Mawokota
10. Kabaka Wanga Kiwanuka I Katoolingo mu Busiro
11. Kabaka Mairwe Jjuuzi – Wannema Bukasa, Ssesse
12. Kabaka Beene e Mitwe Ebiri Busiro (Naye mwana wa Kabaka Muntu)
13. Kabaka Bukulubwawadda e Kiwawu Busujju (Mwana wa Muntu)
14. Kabaka Wanga II e Konge (mwana wa Ssemweezi Maganda)
15. Kabaka Lukenge Senkule e Buddo – Busiro
16. Kabaka Lubanga e Kisaalizi Buluuli
17. Kabaka Musisi Ginda – Bagamba nti Lwaali Zzinga
18. Kabaka Buva e Buddo – Busiro
19. Kabaka Nkuzi e Buddo – Nkuzi ono azaliibwa Ttaka, omu ku baana ba Kabaka Ttonda sossi Ttaka oli owa Mugula e Ntebe
20. Kabaka Mbaale e Mpigi Mawokota

21. Kabaka Sseggulu Ligamba Enjubategaanamunyazi e Mmende ku Kasozi Kizibaawo – Busiro.
22. Kabaka Nnabongo e Kabumbi, Nnansana Busiro
23. Kabaka Bisiriba e Kimoggo Busiro.
24. Kabaka Mukama e Katoolingo – Busiro nga ono kigambibwa nti yali muganda wa Beene (mwana wa K. Muntu).
25. Kabaka Lukiko e Nnaggalabi – Busiro
26. Kabaka Wamala e Busindo
27. Kabaka Gogoombe e Kimwaanyi Busiro
28. Kabaka Kyebagamba e Buddo nga nnyina yali Nnansove yali wa kisa nnyo era omusota mwatambulira tegulumira muntu gwe bayita Nnansove.
29. Kabaka Nnamuwala e Mukono Kyaggwe
30. Kabaka Kasajja e Nnaggalabi
31. Kabaka Kapala e Kapala Busujju.
32. Kabaka Mugerere ku lusozi Kangulumira mu Mabira.
33. Kabaka Milimuggulu Kivuja e Ndejje.
34. Kabaka Njiwe Kiwukyeeru e Ttende, Kisubi mu Bulama Busiro yali mwana wa Milimuggulu Kivuja era ye yali yeddira Nnyonyi nga ye jjajja we Nnyonyi Enyange. Njiwe okusooka yali wa Mamba Nangirra naye Nagginda nnyina kabaka Musisi bwe yagaba emiziro ye natwaala ogwe Nnyonyi.
35. Kabaka Sserwanga Mukasa e Bubembe – Ssese nga ono gwe bayita Mukasa, kabaka we nnyanja kabaka wa bakabaka mutabani wa Mairwe Jjuuzi – Wannema. Bakabaka be Buganda bawangaayo ebintu bingi nnyo gyali nga embuzi, emigugu gye mbugo, ente, abazaana, era be bamuzimbira nga ennyumba ze enkulu Ssikobonga ne Nnankoba.
36. Kabaka Nnambilirwa – Mawokota.
37. Kabaka Muwanga e Nseke e Mpambire Mawokota.
38. Kabaka Mulindwa, Musajja-alindwa Ngabo mutabani wa Lubanga olubiri lwe lulowoozebwa ku beera Ndejje.

39. Kabaka Bwooya e Nnaggalabi Buddo Busiro.
40. Kabaka Laba Nnaggalabi Buddo Busiro.
41. Kabaka Buzunga Nnaggalabi Buddo – Busiro.
42. Kabaka Mutimbwa e Nnagalabi Buddo mwana wa Lukiko.
43. Kimala Empaka Bukulu mutabani wa Mutimbwa nga bano bazzukulu ba Wanga I. olubiri lwena masiro biri Tumbaali mu Busiro.
 Ono nno ye jjajja wa b'emmamba Kakoboza eya Nnankere yekwaasa nti ekikere Balugereza ekyabeeranga mu luzzi Namukalazi olwa b'emmamba Nnamunjolobe kyaali kimufananira bubi, era nti ne Nnamunjolobe yali takyajja yenno kw'ekutondawo Kakoboza! Kano kabamba katono ka kulukalu mu bitaba. Kabaka Kimala Empaka yazaala omulangira Nankere Kiwutta Kyasooka. (Bo aba Nankere bagamba nti Kabaka Kimala empaka mwana wa Kabaka Muwanga Kyekulunga Ssebyoto, Muzzukulu wa Kabaka Wadda, muzzukulu wa Kabaka Musisi Ginda).
44. Kabaka Ntege Nnalusiri Buganda Lunnyo e Ntebe, ono ye jjajja wa be Ffumbe era ono muto wa Kimala Empaka. Olw'okubeera ono balina ne mituba e'mirangira.
45. Kabaka Lubala Nkoose Mbuubi – e Nkose, Mazinga ne Buyovu obwakabaka bwamuweebwa Mayirwe Jjuuzi Wannema nga olutalo lwa Konge lukwajja. Enguugu ye yalinga amaggwa amawanvuko n'ebyooya bye Mpungu nga yonna ezingiriddwa eddiba ly'engo. Yalina empingu nnene eyamuyamba nga okufuga n'okusolooza nga omusolo ne nvujo okuva e Kavirondo Gulf mu Kenya, Kiziba ne mu Burundi. Empingu yo eno kwe kwazimbirwa empingu ya Buganda.
46. Kabaka Nnamasera e Nnamusera – Busiro
47. Kabaka Mudondoli e Nnaggalabi – Buddo
48. Kabaka Katyonsanze e Kyaggwe
49. Kabaka Bbemba e Nnaggalabi – Buddo